

# DIDZA' ZI'AL BSÖLĚ'Ě PABLO YÖDZ CORINTO

**Pablo rugapë' Dios bunách  
queë' Cristo nacu'ë Corinto**

**1** Ca rë'ncznë' Dios bulidzë'  
neda', Pablo, quië gaca' gbaz  
queë' Jesucristo. Runë' neda'  
tsaxón bóchi'ru' Sóstenes. <sup>2</sup>Rugapa'  
Dios lbi'ili', böchi' lza'adau', rudubli'  
queë' Dios lu yödz Corinto, len  
nacli' quizi queë' Dios le nacli' tuz  
len Jesucristo. Dioscz bulidzë' lbi'ili'  
quië gáquili' quizi queë' tsaxón  
len yúgu'të nup nacuá' yúgu'të latj  
len tu'lidzë' Dios, tu'gunë' dxin lë'  
Xanru' Jesucristo, Xanquë' lenca'  
Xanru'. <sup>3</sup>Ráta'yua' lahuë' Xuzru'  
Dios len lahuë' Xanru' Jesucristo  
uzá' ladxë'ë queëli' len gunë' ga soa  
dxi icj ládxi'dau'li'.

**Yugu' le ruzi'ru' xbey le  
náquiru' queë' Cristo**

<sup>4</sup>Réptecza'-në' Dios: "Xclenu'" ca  
nac queëli', le zoa le buzá' ladxë'ë  
queëli' Dios le nacli' tuz len  
Jesucristo. <sup>5</sup>Le nacli' tuz len Cristo,  
Dios chnagu'tsquë' xnözi queëli'  
yúgu'të le naqui queë'. Ráclenë'  
lbi'ili' ca nac yúgu'të didza' rui'li'  
len runë' ga réjni'li' yúgu'të. <sup>6</sup>Cni  
nac, le gzxi' lu na'li' gdu ládxi'li' le

runtu' lna' lau ca nac queë' Cristo.  
<sup>7</sup>Qui lë ni na', cutu bi ryadzj queëli'  
qui le runnë' queëru' Dios Bö' La'y,  
tsal ni rbözli' dza na' gla' lahuë'  
Xanru' Jesucristo. <sup>8</sup>Lëczë' utipë'  
ládxi'li' quië gac gua' glenli' yúgu'të  
ga gdxintë dza udx, cui gac nu bi  
gnë queëli' dza ni' huödë' Xanru'  
Jesucristo. <sup>9</sup>Dios runë' ca rnë', len  
Lëczë' bulidzë' lbi'ili' quië gacli' tuz  
len Zxi'në', Xanru' Jesucristo.

**Narujgac chopl bunách queë'  
Cristo nacu'ë Corinto**

<sup>10</sup>Ni'a queë' Xanru' Jesucristo  
ráta'yua' lauli', böchi' lza'adau',  
gul-gún tuz xtídza'li' yúgu'tëli'.  
Cutu grujli' chopl, san gul-gác  
tuz ca rza' ládxi'li', len ca runi  
lbi'ili'. <sup>11</sup>Cni rëpa' lbi'ili', böchi'  
lza'adau', le gulagu'xjöi'në' neda'  
ca runli' bönni' nacu'ë lidxnu Cloé,  
ta'në' rdil-l dídza'li'. <sup>12</sup>Lë ni rnia':  
"Nadzá' didza' rui'li' tu tuli'." La'li'  
rnali' da'li' Pablo. Yela'li' rnali' da'li'  
Apolos. Yela'li' rnali' da'li' Cefas, ati'  
yela'li' rnali' da'li' Cristo. <sup>13</sup>¿Naru'  
brujtsë' chopl Cristo? ¿Naru' gda'tsa'  
neda', Pablo, lë'i yag cruz uláz  
queëli'? ¿Naru' bdílsali' nis quië  
gacli' tuz len neda'? <sup>14</sup>Rëpa'-në'

Dios: “Xclenu”, le cutu buquila' nis nitúr lbi'ili', san chopzè' Crispo len Gayo. <sup>15</sup>Qui lè ni na' cutu gac gnali' bdil-li' nis quiè gacli' tuz len neda'. <sup>16</sup>Lèzca' buquila' nis Estéfanos, len nup nacuá' lidxè'. Cutu rajneyda' chqui' buquila' nis nu yubl. <sup>17</sup>Bsölè'è neda' Cristo, clèg quiè uquila' bunách nis, san quiè guna' lban qui didza' dxi'a. Ru'a didza', san clèg lu yöl-la' rac sxöni queécza', cui ucacha'a yöl-la' huac qui le benè' Cristo lè'i yag cruz.

**Cristo napczè' yöl-la' huac len yöl-la' rejni'i queè' Dios**

<sup>18</sup>Nup nacgac chul nit taqui ca'z nac lban runru' queè' Jesús, ca na' gutiè' lè'i yag cruz, san rè'u na' nularu', ráquibe'iru' dzag lei yöl-la' huac queè' Dios uslá rè'u. <sup>19</sup>Cni nac, le nayúj lu guich la'y, rna:

Guna' ga huöac daduz yöl-la' rac sxöni

Quegac nup tac sxöni.

Tsla'l uca'na' yöl-la' rejni'i

Quegac nup ta'yejni'i sxöni.

<sup>20</sup>¿Bizxa caz uzi'tsè' xbey bönni' réjni'nè' sxöni? ¿Bizxa caz uzi'tsè' xbey bönni' nazèdtsquè'? ¿Bizxa caz uzi'tsè' xbey bönni' nabé'itsquinè' ru'è didza'? Dios chbenè' ga böac ca'z yöl-la' rejni'i quegac bunách yödzyú ni. <sup>21</sup>Dios, lu yöl-la' rejni'i queè', cutu bè'è latj lunbè' Lè' bunách yödzyú ni ni'a qui yöl-la' rac sxöni quequè'. Dios bdzag ladxè'è buslé' nup ta'yejlè' Lè' ni'a qui lban na' runru', zal-la' taqui bunách ca'z nac.

<sup>22</sup>Tè'nnè' bönni' judío la'lé'inè' yöl-la' huac nacgac bè', ati' bönni' gza'a ta'guiljè' yöl-la' rejni'i. <sup>23</sup>Rè'u

ni runru' lban queè' Cristo, ca na' gutiè' lè'i yag cruz. Le nactè, lban runru' ca gutiè' Cristo, run ga ta'chixi ta'nigui bunách judío, ati' yezica' bunách taqui ca'z nac. <sup>24</sup>Nup na' bulidzè' lequè' Dios, zal-la' nacquè' bönni' judío o bönni' gza'a, táquibe'inè' napczè' Cristo yöl-la' huac queè' Dios len yöl-la' rejni'i queè' Dios. <sup>25</sup>Taqui bunách yödzyú ni le benè' Dios nac bè' cunözi naquè', san lè na' benè' napr yöl-la' rejni'i ca yöl-la' rejni'i quegac bunách. Taqui le benè' Dios nac bè' nacuídi'nè', san lè na' benè' napr yöl-la' huac ca yöl-la' huac quegac bunách. <sup>26</sup>Na'a, böchi' lza'adau', gul-tsajnéy ca gucli' cati' bulidzè' lbi'ili' Dios. Cutu bítsa'què' ladjli' zian bönni' ta'yéjni'nè' lu yöl-la' bunáchz quequè', len cutu bítsa'què' ladjli' zian bönni' uná bè', len clèg zian bönni' nacquè' blau. <sup>27</sup>Yugu' bönni' na' gröè' Dios, taqui bunách yödzyú ni cunözi nacquè'. Cni benè' Dios quiè gunè' ga lutuú'i nup ta'yejni'i. Lèzca' cni gröè' Dios nup nacuídi'gac yödzyú ni quiè gunè' ga lutuú'i nup nalgac. <sup>28</sup>Lèzca' cni, nup na' gröè' Dios, taqui bunách yödzyú ni nacquè' ca'z len cutu bi nacquè', len nacuídi'què'. Cni benè' Dios quiè gunè' ga lugá'n ca'z lè na' tun zxön bunách yödzyú ni. <sup>29</sup>Qui lè ni na', nutu nu gac gun ba zxön cuini lahuè' Dios. <sup>30</sup>Dioscz benè' ga nacru' tuz len Jesucristo, len benè' ga napru' yöl-la' rejni'i queè' Cristo. Le naquè' tuz len rè'u Cristo, nuhuöacru' tsahui', len náquiru' quizi queè' Dios, len nularu'. <sup>31</sup>Nac ca na' nayúj lu guich la'y, rna: “Chqui' zoa nu bi rè'ni gun zxön, ral-la' gun zxön Xanru.”

**Lban runru' queë' Cristo, ca  
gdë'ë lë'i yag cruz**

**2** Cni guc, böchi' lza'adau', cati' bdxina' queëli'. Bena' lban lauli' qui xtidzë'ë Dios, clëg len yöl-la' rejni'i quia', len cutu bë'a didza' lu yöl-la' rac sxöni quia'.  
<sup>2</sup>Cati' ni' gzoálena' lbi'ili', bë' ladxa'a cugu'a didza' qui le yubl, san tuz ca nac queë' Jesucristo bë'a didza', ca na' gdë'ë lë'i yag cruz.  
<sup>3</sup>Gzoálena' lbi'ili' lu yöl-la' rcuidi' quia', ati' lu yöl-la' radxi quia' gzxiztsca'.  
<sup>4</sup>Bé'lëna' lbi'ili' didza' len bena' lban qui xtidzë'ë Dios, clëg ca tui' didza' bunách lu yöl-la' rac sxöni quegacz, san gzoálenë' neda' Dios Bö' La'y, ati' gzoalen neda' yöl-la' huac queë' Dios, le guc bë' nac gdutë li didza' bë'a.  
<sup>5</sup>Cni bena' quië gac tséjllë'li' Dios, clëg le byónili' yöl-la' rac sxöni quegac bunách, san le blé'ili' yöl-la' huac queëczë' Dios.

**Dios Bö' La'y runë' ga  
núnbë'ru'-në' Dios**

<sup>6</sup>Rui'tu' didza' lu yöl-la' rac sxöni laugac nup chnacr gdu ca ta'yejllë' Dios. Yöl-la' rac sxöni ni cutu nac ca le napgac bunách yödzyú ni, len cutu nac ca le napquë' bönni' ta'ná bë'ë dza ni zoaru' na'a, nup na' ta'nítcz.  
<sup>7</sup>Rui'tu' didza' qui yöl-la' rac sxöni nagachi', lë na' runödzjë' Dios, le bgachi' yöl-la' rac sxöni na' buzóë' Dios dza ni'të quië uzi'ru' xbey.  
<sup>8</sup>Cutu glunbë'ë yöl-la' rac sxöni na' bönni' ta'ná bë'ë dza ni zoaru' na'a. La'naru' glunbë'ë lei, cutu ludé'ë lë'i yag cruz Xanru' náctërë' blau.  
<sup>9</sup>Nac ca na' nayúj lu guich la'y, rna:

Chnupé'ë Dios le luzi' xbey nup nadxi'igac Lë',  
 Yugu' le nutu nu ble'i, len cutu byöni,  
 Len cutu gulazá' ládxi'gac bunách ca nac qui.

<sup>10</sup>Na'a, Dios nuzéjni'në' rë'u yugu' lë ni lu në'ë Dios Bö' La'y, le ruyuczë' yúgu'të Dios Bö' La'y, lenca' le yu'u icj ládxi'dau'huë' Dioscz.

<sup>11</sup>¿Naru' gac gnöznë' bönni' le yu'u icj ládxi'dau'huë' yetúë' bönni'? Tuz bö' nacczë' bönni' na' nözi lë na'. Lëzca' cni, nutu nu nözi le yu'u icj ládxi'dau'huë' Dios. Tuzë' Dios Bö' La'y nöznë' lë ni.  
<sup>12</sup>Rë'u ni, cutu nazi' lu na'ru' bö' rdaz yödzyú ni, san nazi' lu na'ru' Dios Bö' La'y, Nu na' ruchizië' rë'u Dios quië gac gúnbë'ru' yugu' le buzá' ladxë'ë queëru' Dios.  
<sup>13</sup>Yugu' lë na' buzá' ladxë'ë queëru' Dios rui'ru' didza' qui, clëg len didza' tu'sëdi rë'u bunách len yöl-la' rac sxöni quegac, san len yugu' didza' rusëdnë' rë'u Dios Bö' La'y. Cni nac, rzéjni'ru' bunách zóalenë' lequë' Dios Bö' La'y ca nac le rusëdnë' rë'u Dios Bö' La'y.

<sup>14</sup>Cutu rzi' lu në'ë le rusëdnë' rë'u Dios Bö' La'y bönni' cuzóalenë' lë' Dios Bö' La'y, le ráquinë' ca'z nac. Cutu gac tséjni'në' lë ni bönni' na', le gac gáquibe'inë' le zaca' lë ni tuzë' bönni' zóalenë' lë' Dios Bö' La'y.  
<sup>15</sup>Gac gáquibe'inë' le zaca' yúgu'të, bönni' zóalenë' lë' Dios Bö' La'y, san nutu nu gac gáquibe'i le záca'czë' bönni' na'.  
<sup>16</sup>Nayúj lu guich la'y, rna:

¿Nuzxa caz nözi le rza' ladxë'ë Xanru'?

¿Nuzxa caz gac uzejni'li Lé'?  
San yu'u icj ládxi'dau'ru' rë'u le rza'  
ladxë'ë Cristo.

**Nacru' huen dxin tsaxxón len Dios**  
**3** Qui lë ni na', böchi' lza'adau',  
cutu guc güi'lena' lbi'ili'  
didza' ca ruí'lena'-në' didza' bönni'  
zóalenë' lë' Dios Bö' La'y, san  
bé'lena' lbi'ili' didza' ca ruí'lena'  
nu nac bunáchz didza', cuzóalenë'  
nu na' Dios Bö' La'y. Nacli' ca bi'i  
huë'n, cunacli' tsutsu ca réjlë'li'  
Cristo. <sup>2</sup>Busëdda' lbi'ili' le cunác  
baníg, lë na' guc ca nidxi' güi'li'.  
Cutu busëdda' lbi'ili' le nac baníg ca  
bëla' gáguli'. Cutu guc tséjni'li' le  
nac ca bëla' gáguli', len cutu racli'  
na'a. <sup>3</sup>Cni nac, le nacli' ca nu nac  
bunáchz ga rdxintë na'a dza. Tsal  
ni ruzxë'ili' lza'li' len rdil-l dídza'li'  
len r-rujli' chopl, nacli' ca nu nac  
bunáchz, len runli' tuz ca tun  
bunách yödzyú ni. <sup>4</sup>Cati' zoalen  
lbi'ili' nu rna da' Pablo nu na', len  
yetú nu rna da' Apolos, nacli' ca nu  
nac bunáchz.

<sup>5</sup>¿Nuzxa caz naca' neda', Pablo?  
¿Nuzxa caz na' Apolos? Nactu'  
huen dxin queë' Dios, ati' ni'a  
quí le bentu' gyéjlë'li' Cristo. Tu  
tutu' runtu' dxin na' bennë' qui  
queëtu' Xanru'. <sup>6</sup>Dxin bentu' lu icj  
ládxi'dau'li' nac ca dxin run nu raz  
ruzóa. Neda' guza' xseydau', ati'  
Apolos glu'ë nis, san Dios benë' ga  
blen len gzxön xseydau' na' nadúz  
icj ládxi'dau'li'. <sup>7</sup>Cni nac, lati'z  
zaquë' bönni' guz, len lati'z ca'  
bönni' rgu'ë nis, san záqui'tsquinë'  
Dios Nu run ga rlen len rzxön  
xseydau' na'. <sup>8</sup>Tuz ca nacquë' bönni'  
razë' len bönni' rgu'ë nis. Dios ubi'ë

qui queëquë' tsca nac dxin tunë'.  
<sup>9</sup>Nactu' huen dxin tsaxxón len Dios,  
ati' lbi'ili' nacli' ca la' yël queë' Dios  
ga runtu' dxin.

Lëzca' cni nacli' ca tu yu'u runë'  
Dios. <sup>10</sup>Ca nac le buzá' ladxë'ë  
quia' Dios, naca' ca huen zö'ö  
blau. Neda' glu'a xlibi zö'ö, ati' nu  
yubl rchis zö'ö na'. Tu turu' ral-la'  
uyuru' ca rchisru' zö'ö lahui xlibi  
zö'ö na'. <sup>11</sup>Dios chglu'ë xlibi zö'ö  
le nac Lëczë' Jesucristo, ati' nutu  
nu gac cu'u yetú xlibi zö'ö. <sup>12</sup>Dxin  
runru' queë' Cristo nac ca rchisru'  
zö'ö lahui xlibi zö'ö na'. Lahui xlibi  
zö'ö na' gac nu gun dxin rchis zö'ö  
le nac ca le náquini oro, o plata,  
o guiöj záqui'tsquisgac, o gac nu  
gun dxin le nac ca rchis zö'ö le  
náquini yag, o guizx, o guixi' ca'z.  
<sup>13</sup>Gac bë' ca nac dxin nungac tu tu  
bunách. Cati' gdxin dza gchuguë'  
quegac bunách Dios, gla' lahui dxin  
nunru', le töd lu gui' dxin na', ati'  
gui' na' si' bë' dxin nungac tu tu  
bunách. <sup>14</sup>Chqui' urúj dxia' lu gui'  
na' dxin nunë' bönni' le nac ca tu  
zö'ö bchisë', Dios ubi'ë queë' ca  
rajlóz dxin nunë'. <sup>15</sup>Chqui' tsegui  
dxin nunë' bönni' le nac ca tu zö'ö  
bchisë', unitië' le rë'nne' ubi'ë queë'  
Dios, san ulaczë' lë', gac queë' ca  
rac qui nu rulá tu lu gui'.

<sup>16</sup>¿Naru' cu nózili' nacczli' gdau'  
queë' Dios, ati' zoë' icj ládxi'dau'li'  
Dios Bö' La'y? <sup>17</sup>Chqui' nu usnít  
gdau' queë' Dios, Dios usnitië' nu  
na', le nac la'y gdau' queë' Dios, ati'  
lbi'iczi'li' nacli' gdau' na'.

<sup>18</sup>Cutu si' ye'i cuinli'. Chqui' raqui  
nu nutsa' ladjli' rac szxöni ca tac  
szxöni bunách yödzyú ni, ral-la'  
huöac nu na' ca bönni' cunözi, quië

gata' qui yöl-la' rac szxöni le nac gdu. <sup>19</sup>Bönni' napzè' yöl-la' rac szxöni qui yödzylyú ni naquè' cunözi lahuè' Dios. Nayúj lu guich la'y, rna: "Dios runè' ga la'chixi la'nigui nup tac szxöni, rugunè' dxin yöl-la' rac szxöni quegac." <sup>20</sup>Lèzca' cni rna: "Xanru' nöznè' daduz nac le ta'bequi icjgac bunách tac szxöni." <sup>21</sup>Qui lè ni na', cutu ral-la' gunli' xön le gac gunè' bönni'. Naqui queèli' yúgu'tè. <sup>22</sup>Náquigac queèli' Pablo, len Apolos, len Cefas, len yödzylyú ni, len yöl-la' na'bán, len yöl-la' gut, len dza ni zoaru' na'a, len dza zi'a za'. Yúgu'tè naqui queèli', <sup>23</sup>ati' lbi'ili' náquili' queè' Cristo, ati' Cristo náquinë' queè' Dios.

**Dxin tunè' bönni' gbaz  
nasölè'è Cristo**

**4** Qui lè ni na', ral-la' gáquili' nactu' netu' huen dxin queè' Cristo, len dè lu na'tu' le nagachi' queè' Dios. <sup>2</sup>Yugu' bönni', Dios nudödè' lu na'què' lugunè' dxin le naqui queè', run bayúdx lunè' gdu dxi'a le tunè'. <sup>3</sup>Cutu bi rui' ladxa'a chqui' cuequi xbeyli' neda', o chqui' la'bequi xbey neda' bunách yödzylyú ni. Cutu ca' rbequi xbey cuina'. <sup>4</sup>Cutu ruxós neda' ládxi'dau'hua'. Lè ni cutu nac bè' cunabaga'a zxguia'. Xanru' naquè' Nu rbequi xbey neda'. <sup>5</sup>Qui lè ni na', nutu nu ral-la' cuequi xbeyli' zi'al ca gdxin dza qui. Gul-cóz dza ni' huödè' Xanru', ati' Lè' ubijè' ga lna' le nagachi' ga chul, len ulu'è lahui le yu'u icj ládxi'dau'gac bunách. Ní'r Dios ubi'è qui queègac bunách le gun ba la'n lequè' ca ral-la' gunè'. <sup>6</sup>Na'a, böchi' lza'adau', ca nac lè ni, bè'a didza' qui le runtu' netu',

Apolos len neda'. Huac usèdli' ca runtu' netu' quiè gunli' le nayújz lu guich la'y, cutu gunli' xön tu bönni' len cutu uzoali' tsla'l yetué'. <sup>7</sup>¿Nuzxa caz ben ga nacu' li' blau? ¿Bizxa caz bdél-li'nu' li' le cutu bennè' quiu' Dios? Chqui' Lè' bennzè' quiu' lè na' dè lu na'u, ¿bizx quiè run ba xön cuinu', ráquinu' racz quiu' bdél-li'nu' lè na'?

<sup>8</sup>¿Naru' ráquitsali' nadél-li'tèrli'? ¿Naru' ráquitsali' rlé'ili' yöl-la' tsahui' queèli'? ¿Naru' ráquitsali' rna bè'li', zal-la' cutu rna bè'tu' netu'? Ni'a queè' Xanru' Dios rè'nda' gna bè'li' quiè gac gna bé'lentu' lbi'ili' tsaxxón. <sup>9</sup>Runi neda' nac queètu', bönni' gbaz queè' Dios, ca nuzóè' netu' zeajtu' xbanti ca na' rac quequè' bönni' chnarugu quequè' latiè' lahui' laugac bunách. Nactu' ca tu le tu'yutsca bunách yödzylyú ni, lenca' ca tu le tu'yutsquè' gbaz la'y queè' Dios. <sup>10</sup>Le ré'nitu' guntu' xchinè' Cristo, rui'tu' bunách latj taqui nactu' cunözi, san lbi'ili' ráquili' racli' szxöni le nacli' queè' Cristo. Lbi'ili' ráquili' chnal-li', san taqui bunách nacu'idi'tu' netu'. Tu'zóa netu' tsala' bunách, san tun lbi'ili' ba la'n. <sup>11</sup>Ga rdxintè na'a dza, rduntu' len rbidxtu' nis. Cutu dè lari' gácutu'. Tun netu' zi' bunách len cutu zoa lidxtu'. <sup>12</sup>Rusaca' zi' cuintu', la' netu'z runtu' dxin. Tu'lídz netu' zi' bunách, san netu' rnabtu' le gaclen lequè'. Ta'bía ládxi'gac netu' bunách, san rua' rlentu' lei. <sup>13</sup>Ta'né' queètu', san lu yöl-la' nöxj ladxi' ru'f'entu' lequè' didza'. Ga rdxintè na'a dza nactu' ca bèb qui yödzylyú

ni len ca tu le ta'ru'n ni'l yúgu'të bunách.

<sup>14</sup>Ruzuja' queëli' cni lu guich, clëg le rè'nda' guna' ga utu'i'li', san rè'nda' uzéjni'da' lbi'ili', runa' ca runë' bönni' ruzéjni'në' yugu' zxi'nczë' nadxi'inë' lecbi'. <sup>15</sup>Zal-la' gac la'cua'len lbi'ili' zian gayu'ë bönni' lusëdnë' lbi'ili' ca nac queë' Cristo, tuz nu zoa nac ca xuzli', nu na' ben ga náquili' queë' Cristo. Lu yöl-la' na'bán cub napli' le dzagli' Cristo, néda'cza' naca' ca xuzli' le busyönda' lbi'ili' didza' dxi'a. <sup>16</sup>Qui læ ni na', ráta'yua' lauli' güi' ládi'li' gunli' ca runa' neda'.

<sup>17</sup>Qui læ ni na' ca' rsöla'a-bi' queëli' bi'i Timoteo. Le réjlë'bi' Xanru' nacbi' ca zxi'ncza', nacbi' gdu ladxi', ati' nadxi'ida'-bi'. Gunbi' Timoteo ga tsajneyli' yugu' zxba rusëdda' le náquida' queë' Cristo, yugu' le rusëdda' yúgu'të latj laugac yúgu'të cö' bunách queë' Cristo. <sup>18</sup>La'li' run ba zxon cuinli' le ráquili' cutur udxina' ga zoali'. <sup>19</sup>Na'a, la' udxintea' ga zoali' chqui' gunnë' neda' latj Xanru'. Ni'r gáquibe'ida', clëg didza'z tu'ë bönni' tun ba zxon cuinquë', san gáquibe'ida' chqui' zoalen lequë' yöl-la' huac queë' Dios. <sup>20</sup>Chqui' nazí' lu na'li' rna bé'inë' lbi'ili' Dios, cutu nac bè' nac cni le rnazli' ca'. Nac bè' nac cni chqui' zoalen lbi'ili' yöl-la' huac queë' Dios. <sup>21</sup>¿Bizxal ré'nili'? ¿Naru' ré'nili' udxina' ga zoali' len gba'y, gut quina' lbi'ili', o len yöl-la' nadxí' len lu yöl-la' nöxj ladxi'?

**Pablo rbequi xbeynë'  
bönni' runë' le cunác**

**5** Rzë didza' zóalenë' lbi'ili' bönni' runë' le cunác, zóalenë'

ngul queë' xuzë'. Le cunác cni cutu ca' tun bunách cunúnbë'gac Dios. <sup>2</sup>Lbi'ili' run ba zxon cuinli', san ral-la' hu'i'nili' len ubiajli' ga zoali' nu na' run dul-la' na'. <sup>3</sup>Zal-la' cutu zóalena' lbi'ili' lu gdu ca nayá' nabana', le nactë zóalena' lbi'ili' lu bö' naccza'. Ca chzóalencza' lbi'ili' chglequi xbeyda' nu na' run dul-la' na'. <sup>4</sup>Cati' udubli' queë' Xanru' Jesucristo guna' lbi'ili' tsaxxón lu bö' naccza'. Ni'r, len yöl-la' huac queë' Xanru' Jesús <sup>5</sup>gul-dödë' bönni' na' lu na' Satanás tu' xöhu'i' quië nit gdu ca nayá' nabanë', san ulá bö' nacczë' dza ni' huödë' Xanru'.

<sup>6</sup>Cutu nac dxi'a gun ba zxon cuinli' ca nac le runli'. ¿Naru' cu nózili' didza' na' rna: "Xné'idauz yöt xtil gun ga gyazx gdu'të cua nazí' lei."? <sup>7</sup>Na'a, gul-cúa ga zoali' dul-la' na' le nac ca tu xnë'i gul, quië gacli' dxi'a. Ni'r gacli' ca tu cua cub cunazí' xnë'i, ca na' le nactë chnacli'. Nac queëru' ca choaru' Lni Pascua cati' tahuë' yöt xtil cunazí' xnë'i, len chguludöddë'-ba' uláz queëru' bö'cu' zxila' qui Lni Pascua na', bö'cu' zxila' na' naquë' Lëczë' Cristo. <sup>8</sup>Qui læ ni na' ral-la' gunru' lni na', clëg zoalen rè'u xnë'i gul na' ruluí' le cunác len le cuzaca', san ral-la' ugunru' dxin yöt xtil na' cunazí' xnë'i, yöt xtil na' ruluí' le nac gdu dxi'a len le nac gdu'të li.

<sup>9</sup>Cati' buzuja' queëli' lu guich zial, gudxcza' lbi'ili' cutu gunli' tsaxxón bönni' tunë' le cunác. <sup>10</sup>Gudxa' lbi'ili' cni, clëg quië ucuitli' tsaz ga nacua' bunách yödzyly' ni, tun le cunác, len ga nacua' bunách

ta'zé ládxi'gac le dë qui lza'gac, len ga nacua' gban, len bunách ta'yíj ládxi'gac bdau' guiöj bdau' yag. Quië gunli' cni gun bayúdx grujli' yödzyú ni. <sup>11</sup>Le rë'ni gna didza' na' buzuja' queëli' lu guich, nac cui gunli' tsaxxón bönni' rnë' náquinë' queë' Cristo, san runë' le cunác, o rzë ladxë'ë le dë qui lzë'ë, o rej ladxë'ë bdau' guiöj bdau' yag, o rnë xöhuë'ë, o rzúdxinë', o rbanë'. Cutu ca' gágulenli' tsaxxón bönni' cni. <sup>12-13</sup>Cutu naqui quia' neda' cuequi xbeyda' nup cunababgac rë'u. Dios cuequi xbeynë' lequë'. Lbi'iczi' ral-la' cuequi xbeyli' nup nababgac lbi'ili'. Qui lë ni na', gul-cúë' ga zoali' bönni' xöhui' na'.

**Cutu ral-la' gchë'ru' böchi'  
lza'ru' laugac bunách yúlahui'**

**6** Cati' rdil-l dídza'li' tuli' len yetuli', ñnacxcz rurúguili' tseajli' yúlahui' ga la'bequi xbey lbi'ili' nup cuta'yejlë' Cristo? Dxi'ar tseajli' laugac bunách queë' Cristo quië la'bequi xbey lbi'ili'. <sup>2</sup>¿Naru' cu nózili' ral-la' la'bequi xbey yúgu'të bunách yödzyú nup náquigac queë' Cristo? Chqui' lbi'iczi' cuequi xbeyli' bunách yödzyú, ñnaru' cu napli' yöl-la' rejni'i' cuequi xbeyli' didza' bizxj cni? <sup>3</sup>¿Naru' cu nózili' ral-la' cuequi xbeyru' yugu' gbaz la'y? Runtër bayúdx cuequi xbeyru' le tac yödzyú ga ni zoaru' na'a. <sup>4</sup>Na'a, chqui' rac tu le run bayúdx nu cuequi xbey, lë na' rac yödzyú ni, ñbizx quië rucua'li' nup la'bequi xbey lei, nup na' cutu bi dë lu na'gac ladjgac bunách queë' Cristo? <sup>5</sup>Rnia' cni

quië guna' ga utui'li'. ¿Naru' cu zoalen lbi'ili' nu rac lati' nu gac cuequi xbey le rac quequë' böchi' lza'li'? <sup>6</sup>¿Nacxcz gac bönni' rejle'ë Cristo gchë'ë böchi' lzë'ë yúlahui' ga la'bequi xbey lequë' bunách cuta'yejlë'?

<sup>7</sup>Le nactë rchixi rníguili' le rdil-l dídza'li'. ¿Bizx quië cutu gua' glenli' nu rua' dö' queëli'? ¿Bizx quië cutu gua' glenli' nu rucáchi'lan le dë queëli'? <sup>8</sup>Lbi'ili' rua'li' dö' len rucachi' lanli', ati' runli' cni quequë' böchi' lza'li' ta'yejlë'ë Cristo.

<sup>9-10</sup>¿Naru' cu nózili' cutu la'yáz ga rna bë'ë Dios bunách cunacgac tsahui'? Cutu si' ye'i cuinli'.

Cutu ca' tsaz ga rna bë'ë Dios nitú nu run le cunác.

Nitú nu rej ladx'i' bdau' guiöj bdau' yag,

Len nitú nu rguitsj zxba qui yöl-la' nutság na',

Len nutu nu bönni' run cuinë' ca ngul,

Len nutu nu bönni' zóalenë' la' lzë'i' bönni'zë',

Len nitú gban,

Len nitú nu ruhuidi',

Len nitú nu rzudxi,

Len nitú nu rnë xöhui',

Len nitú nu rucáchi'lan.

Cutu ca' tsaz ga rna bë'ë Dios nu run cni.

<sup>11</sup>Cni gucli' la'li' lbi'ili', san na'a chnuhuöacl'i' dxi'a ca nac dul-la' gbága'li', len chnáquili' quizi queë' Dios, len chnuhuöacl'i' tsahui' ni'a qui le benë' Xanru' Jesús. Bö' La'y queë' Dios runë' ga rac cni.

**Naqui quizi queë' Dios  
gdu ca nayá' nabinru'**

<sup>12</sup>Ta'ná bunách: “Yúgu'tè dè latj gunru'.” Zal-la' nactè didza' ni, cutu ral-la' gunru' yúgu'tè. Zal-la' dè latj guna' yúgu'tè, cutu gu'a latj bi gna be'i neda'. <sup>13</sup>Ta'ná ca' bunách: “La' huagu nacz le tsaz lè'ru', ati' lè'ru' nacz ga tsudzu la' huagu.” Nactè didza' ni, san gdxin dza usnitie' Dios la' huagu lenca' lè'ru'. Dios benè' gdu ca nayá' nabinru', clèg quiè ugunru' lei dxin gunru' le cunác. Nac quiè uzi'è xbey Xanru', ati' Xanru' naquè' quiè uzi'è xbè' gdu ca nayá' nabinru'. <sup>14</sup>Dios buspanè' Xanru' lu yöl-la' gut. Lèzca' cni, len yöl-la' huac queë' uspanè' rè'u.

<sup>15</sup>¿Naru' cu nózili', lu gdu ca nayá' nabinli' nacli' tuz len le nacczè' Cristo? ¿Nacxcz gac cúali' tu le da' Cristo len gunli' ga ta' ngul udá dzag? Cutu ca' ral-la' gunli' cni. <sup>16</sup>¿Naru' cu nózili' chqui' zóalenè' ngul udá dzag bönni', naquè' tuz len lènu? Ca nac lè ni nayúj lu guich la'y, rna: “Lacquè' ca tuz bunách gropè'.” <sup>17</sup>Na'a, nu bönni' naquè' tuz len Xanru', naquè' tuz len Lè' lu bö' nacczè'.

<sup>18</sup>Qui lè ni na', cutu ca' gunli' le cunác. Bítitèz dul-la' yubl runè' bönni', ni' lu le nacczè' runè' dul-la' na'. Nu bönni' runè' le cunác, runè' dul-la' le dzag lèzca'. <sup>19</sup>¿Naru' cu nózili' nac gdau' queë' Dios Bö' La'y gdu ca nayá' nabinli'? Dioscz nuchizè' lbi'ili' Dios Bö' La'y na', ati' Lè' zoè' icj ládxi'dau'li'. Qui lè ni na' cutu naqui queëzli' gdu ca nayá' nabinli'. Na'a, naqui queë' Dios.

<sup>20</sup>Dios gu'ue' lbi'ili' len tu le xön

gdixzjè'. Gul-gún dxin gdu ca nayá' nabinli' lenca' bö' nacczli' quiè gac queë' Dios yöl-la' ba, le náquigac queë' Dios gdu ca nayá' nabinli' lenca' bö' nacczli'.

**Rusèdnè' Pablo ca nac  
qui yöl-la' nutság na'**

**7** Na'a, ubi'a didza' yugu' le gnábili' neda', le buzujli' quia' lu guich. Gac dxi'a queë' bönni' chqui' cutu sóalenè'-nu ngul. <sup>2</sup>Le tuntsca le cunác bunách ga ni' zoali', ral-la' la'cuá'lenè'-nu ngul qui queëquè' yúgu'tè bönni' nababquè' lbi'ili', ati' ral-la' la'cuá'lennu-nè' bönni' qui queécnu yúgu'tè ngul. <sup>3</sup>Bönni' na' zoanu ngul queë' ral-la' gunè' queènu ngul queë' ca nac yöl-la' run qui yöl-la' nutság na', len la' tuz ca ral-la' gunnu ngul len bönni' queènu. <sup>4</sup>Cutu dè lu na'znu ngul gdu ca nayá' nabannu, san bönni' queènu dè lu nè'è ca' lei. Lèzca' cni, cutu dè lu na'zè' bönni' gdu ca nayá' nabanè', san ngul queë' dè lu na'nu ca' lei. <sup>5</sup>Cutu ral-la' la'dá'baguè'è lza'què' bönni' len ngul na' nutság na'què'. Huac tuz chqui' lunè' tuz didza' cutu la'dzaguè' tu chi'z quiè gac lulidzè' Dios gdu ládxi'què'. Töd na', leyúbl ral-la' sóalenè'-nu ngul queë' bönni' na', cui saqui' Satanás tu' xöhui' gun ga tsazquè' nöz dul-la' le cutu gac la'ná be'i cuinquè'.

<sup>6</sup>Lè ni rèpa' lbi'ili' nac tu le runnè' lbi'ili' latj Xanru'. Cutu nac le gna bè'è. <sup>7</sup>Runi neda' gacr dxi'a luga'nè' tuz yúgu'tè bönni', ca na' zoa' tuza' neda'. Tu tuè' bönni' rzi'è tsa le runödzejè' queë' Dios gunè'. Tuè' rzi'è tu le runödzejè', ati' yetué' rzi'è yetú le runödzejè'.



<sup>8</sup>Na'a, rēpa' nup nacua' tuz lenca' yugu' ngul uzé'b, rnia': Gac dxi'a quequē' luga'nē' tuz ca na' zoa' tuza' neda'. <sup>9</sup>Chqui' cutu gac la'ná be'i cuinquē', huac lutság na'quē', le gacr dxi'a lutság na'quē' len cu la'zē lādxi'quē' le cunác.

<sup>10</sup>Rna bé'ida' nup chnutság na'gac, len clēg neda'z runa' zxba ni, san Lēczē' Xanru' runē' lei, ati' rna: "Cutu ulá'alennu-nē' bōnni' queēnu ngul." <sup>11</sup>Chqui' ulá'alennu-nē' bōnni' queēnu ngul, ral-la' uga'nnu tuznu, o huōacnu tuz len bōnni' queēnu na'. Lēzca' cni cutu uca'nē'-nu ngul queē' bōnni'.

<sup>12</sup>Na'a, neda'z rēpa' yezica' bunách len clēg rnē' cni Xanru', rnia': Chqui' zoē' böchi' lza'ru' rejlē'è Cristo, ati' cutu réjlē'nu Xanru' ngul queē', len chqui' ré'ninu ugá'nlennu lē', cutu ulá'alēnē'-nu. <sup>13</sup>Lēzca' cni rnia': Chqui' zoanu ngul zanru' réjlē'nu Cristo, ati' bōnni' queēnu cutu rejlē'è Xanru', len chqui' ré'nnē' ugá'nlenē'-nu, cutu ulá'alennu lē'. <sup>14</sup>Cni ral-la' lunē'. Bōnni' curejlē' na', Dios rlé'inē' lē' ca bōnni' náquinē' quizi queē' le naquē' tuz len ngul queē' réjlē'nu Cristo, ati' ngul cni, curéjlē'nu, Dios rlé'inē'-nu ca ngul náquinu quizi queē' le nacnu tuz len bōnni' queēnu naquē' böchi' lza'ru' rejlē'è Cristo. La'naru' cu nac cni, lacbi' zxi'nli' ca yugu' bi'i lagu' lahuē' Dios. Na'a, naccbi' quizi queē' Dios. <sup>15</sup>Nu bōnni' o ngul curejlē' Cristo, chqui' ré'ni ula'alēn nu na' nutság na'len, huac ca'. Cutu run bayúdx uga'nlen nu na' böchi' lza'ru' o zanru' rejlē'è Cristo, le bulidzē' rē'u Dios quiē cōzru'

dxí'adau'. <sup>16</sup>Cni ral-la' gac. Nazx ca' li', ngul, huac gunu' ga ulé' bōnni' quiu', ati' nazx ca' li', bōnni', huac gunu' ga ulanu ngul quiu'.

<sup>17</sup>Ral-la' gunru' tu turu' tsca le bunōdzjē' queēru' Xanru', lenca' tsca guc queēru' cati' bulidzē' rē'u Dios quiē gáquiru' queē'. Zxba ni rusēdda' yúgu'tē cō' bunách queē' Cristo. <sup>18</sup>Chqui' Dios bulidzē' bōnni' narugu lu xpēlē'è le nac bē' náquinē' queē' Dios, ral-la' uga'nē' cni, zoa lu xpēlē'è lē na' nac bē'. Lēzca' cni, chqui' Dios bulidzē' bōnni' cunarugu lu xpēlē'è lē na' nac bē', cutu ral-la' gchuguē' lu xpēlē'è lē na'. <sup>19</sup>Cutu bi zaca' lē na' narugu lu xpēlē'è bōnni', len chqui' cunarugu lu xpēlē'è bōnni' lē na' nac bē', cutu bi zaca'. Le nactsca lsaca' nac gunru' ca rna bē' zxba queē' Dios. <sup>20</sup>Ral-la' uga'nē' bōnni' ca na' guquē' cati' ni' bulidzē' lē' Dios. <sup>21</sup>Chqui' bulidzē' li' cati' ni' nacu' bōnni' nada'u, cutu cō'u baguí'i le nacu' cni, san chqui' gata' quiu' latj gruju' lu na' xanu', buzí' xbey latj na' gata' quiu' gruju'. <sup>22</sup>Chqui' bulidzē' nu bōnni' Xanru' cati' ni' nada'uē', lahuē' Xanru' naquē' ca bōnni' narujē' lu nē'è xanē' na', quiē gunē' xchinē' Xanru'. Lēzca' cni, chqui' bulidzē' nu bōnni' Xanru' cati' ni' narujē' lu nē'è xanē' na', bōnni' ni naquē' ca bōnni' nada'u queē' Cristo. <sup>23</sup>Zxōntēr le gdixjē' Dios, gu'uē' lbi'ili'. Qui lē ni na' cutu ral-la' guti' cuinli' lu na'gac bunách. <sup>24</sup>Qui lē ni na' ca', böchi' lza'adau', ral-la' soali' lahuē' Dios tsca guc queēli' tu tuli' cati' ni' bulidzē' lbi'ili' Dios.

<sup>25</sup>Ca nac quegac nup cunutság na'gac, cutu bi gna bé'inē' neda'

Xanru'. Cni runi neda', ati' huac uzxöni ládxi'li' neda' le ruhuechi' ladxë'ë neda' Xanru'. <sup>26</sup>Le tac zian le rac queëru' dza ni zoaru' na'a, runi neda' gac dxi'a chqui' luga'në' yúgu'të bönni' ca nacquë' na'a. <sup>27</sup>Chqui' nutság ná'lenu'-nu ngul, cutu ulá'alenu'-nu. Lézca' cni, chqui' zu' tuzu', cutu quilju'-nu ngul, cutu utság ná'lenu'-nu. <sup>28</sup>Na'a, chqui' utság ná'lenu'-nu ngul, cutu gunu' dul-la', len chqui' utság ná'lenbi'-në' bönni' bi'i ngul, cutu gunbi' dul-la', san la'zaca' la'guí'i yödzyú ni nup nutság na'gac, ati' rë'nda' guna' ga ulali' lu yöl-la' rzaca' rguí'i na'. <sup>29</sup>Na'a, lë ni rëpa' lbi'ili', böchi' lza'adau'. Chzoa gdxin dza udx. Qui lë ni na', ral-la' lui' ládxi'quë' Dios bönni' nutság ná'lenquë'-nu ngul ca run nu cunutság na'len ngul. <sup>30</sup>Lézca' cni, ral-la' ludziji lahuë' Dios nup ta'bódx yechi' ca run nu curbódx, ati' ral-la' la'cuá' nöxj lahuë' Dios nup tu'dziji ca run nu curudziji, ati' ral-la' lac nup ta'u ca nu cutu bi dë qui. <sup>31</sup>Ral-la' lac nup tu'gún dxin le dë yödzyú ni ca nu cutu rui' ladxí' le dë yödzyú ni, le huadód quegac le rlé'iru' yödzyú ni. <sup>32</sup>Rë'nda' cutu ubi ugui'ili'. Rui' ladxë'ë le naqui queë' Xanru', nac gunë' le rdzag ladxë'ë Xanru', bönni' cuzoanu ngul queë'. <sup>33</sup>Rui' ladxë'ë le rac yödzyú, nac gunë' le rdzag ládxi'nu ngul queë', bönni' nutság ná'lenë'-nu ngul. <sup>34</sup>Lézca' cni rac queënu ngul nutság ná'lennu-në' bönni' len queënu ngul zoanu tuznu. Ngul na' zoanu tuznu rui' ládxi'nu le naqui queë' Xanru', nac soanu quizi queë' Dios lu gdu ca nayá' nabannu len lu bö' naccznu.

Ngul na' nutság ná'lennu-në' bönni' rui' ládxi'nu le rac yödzyú ni, nac gunnu le rdzag ladxë'ë bönni' queënu.

<sup>35</sup>Yugu' lë ni rëpa' lbi'ili' quië uzi'li' xbey lë ni len clëg quië uzaga'a xnözli'. Rë'nda' gunli' le ral-la' gunli', gunli' xchinë' Xanru' gdu ládxi'li'.

<sup>36</sup>Chqui' zoë' bönni' ráquinë' cunác dxi'a uga'nbi' tuzbi' bi'i ngul ra'bandau' queë', len chzoa iz queëbi', len bayúdx ré'nibi' utság ná'lenbi'-në' bönni', huac utság ná'lenbi'-në'. Cutu gunbi' dul-la'. <sup>37</sup>Chqui' chnun tsutsu xtidxë'ë bönni' na', len cutu run bayúdx gunë' cni, len dë lu në'ë nac gunë', len chnun tsutsu xtidxë'ë uga'nbi' tuzbi', gunë' le nac dxi'a bönni' na'. <sup>38</sup>Cni nac, nu rui' latj bi'i qui utság ná'lenbi'-në' bönni', run le nac dxi'a, san nu run ga uga'nbi' tuzbi' run le nacr dxi'a.

<sup>39</sup>Ngul nutság ná'lennu-në' bönni', rna belí lënu zxba qui yöl-la' nutság na' tsal ni zoë' nabanë' bönni' queënu. Chqui' gatië' bönni' queënu, gata' lu na'nu utság ná'lennu-në' nu bönni' ré'ninu, chqui' rejlë'ë Xanru' bönni' na'. <sup>40</sup>Runi neda' gacrun bica' ba chqui' uga'nnu tuznu, len ráquida' runë' neda' tzazxón Bö' La'y queë' Dios.

#### Le ta'gú'u bunách laugac bdau' guiöj bdau' yag

**8** Na'a, gu'a didza' ca nac qui le ri'j ráguru', lë na' gulagú'u bunách laugac bdau' guiöj bdau' yag. Ta'ná bunách: “Yúgu'tëru' napru' yöl-la' rejni'i.” Nactë lë ni. Yöl-la' rejni'i cni run ga run ba

zxön cuinru', san yöl-la' nadxí'i queëru' lza'ru' run ga ráclenru' lza'ru'. <sup>2</sup>Chqui' zoë' bönni' ráquinë' chréjni'në', cutu bi réjni'nidë' ca ral-la' tséjni'në', <sup>3</sup>san nu bönni' nadxí'inë' Dios, Dioscz zóalenë' bönni' na'.

<sup>4</sup>Na'a, ca nac qui le ri'j ráguru', lë na' gulagú'u bunách laugac bdau' guiöj bdau' yag, nóziru' cutu bi záca'gac yödzlyú ni bdau' guiöj bdau' yag na', len nutur nu zoa nac Dios. <sup>5</sup>Zal-la' nacuá' le taqui bunách nacgac dios, le nacuá' luzxbá, len le nacuá' luyú, ati' zian le tu'lídz bunách, tui' lagac dios lenca' xan, <sup>6</sup>san queëru' rë'u:

Tuzë' Naquë' Dios, Lë' Xuz.

Lë' benë' yúgu'të le rlé'iru',

Ati' zoaru' nabanru' quië tsej ládxi'ru' Lë'.

Tuzë' Naquë' Xanru', Lë'

Jesucristo.

Lu në'ë Lë', Dios benë' yúgu'të le dë,

Ati' nabániru' Lë'.

<sup>7</sup>Clëg yúgu'të böchi' lza'ru' ta'yéjni'në' lë ni. La'quë', nup ni' zi'al gulayíj ládxi'gac bdau' guiöj bdau' yag, ga rdxintë na'a dza ti'j tahuë' le gulagú'u bunách laugac bdau' guiöj bdau' yag, ati' táquinë' nap yöl-la' huac qui bdau' na'. Le cutu nac gdu ládxi'quë', qui lë ni na' táquinë' nabága'quë' xzguia' le tahuë' lë na'. <sup>8</sup>Cutu gun ga gunë' rë'u ba la'n Dios le gui'j gáguru', le chqui' gáguru', cutu gacr-ru' dxi'a, len chqui' cutu gáguru', cutu gacr-ru' ca'z. <sup>9</sup>Dë lu na'li' gui'j gáguli' bíti'tëz. Gul-gún chi'i cuinli' cui gunli' ga la'chixi la'nigui nup cunác gdu ca ta'yëjlë' Cristo. <sup>10</sup>Nazx

ca' li' ráquinu' napu' yöl-la' rejni'i ca nac lë ni len huac gagu' bíti'tëz. Chqui' cö'u xlatj bdau' guiöj bdau' yag len gui'j gagu' le gulagú'u bunách lau bdau' guiöj bdau' yag na', ati' chqui' glé'inë' li' rë'u ragu' ni' böchi' lza'u cunác gdu ladxë'ë, nazx ca' gunu' ga gahuë' lë na' gulagú'u bunách lau bdau' guiöj bdau' yag na'. <sup>11</sup>Cni gac, le ráquinu' napu' yöl-la' rejni'i, gunu' ga gchixi gnignë' böchi' lza'u cutu nac gdu ladxë'ë. ¿Naru' guntsau' cni queë' böchi' lza'u, ni'a qui nu na' gutië' Cristo? <sup>12</sup>Chqui' cni gunu', gunu' dul-la' le uspagu'u böchi' lza'u xzguia' len gunu' ga gchixi gnignë' le cutu nac gdu ladxë'ë, len gunu' ca' dul-la' le ruzóa Cristo tsla'l. <sup>13</sup>Qui lë ni na', chqui' le gui'j gahua' gun ga gchixi gnignë' böchi' lza'a, cutur gahua' bëla' na', cui guna' ga gunë' dul-la' böchi' lza'a.

#### Le dë lu në'ë bönni' gbaz nasölë'ë Cristo

**9** ¿Naru' cu naca' gbaz nasölë'ë Cristo? ¿Naru' cu nadél-li'da' yöl-la' ruslá? ¿Naru' cu blé'ida'-në' Xanru' Jesús? ¿Naru' cu nacli' queë' Cristo ni'a qui dxin bena' uláz queë' Xanru'? <sup>2</sup>Nazx ca' taqui yezica' bunách cutu naca' gbaz nasölë'ë Cristo. Lbi'ili' run bayúdx gáquili' naca' gbaz queë' Cristo. Le nacli' queë' Xanru', le nacczli' nac bë' naca' gbaz nasölë'ë Xanru'.

<sup>3-4</sup>Nacuá' nup ta'zí' quidza' neda'. Cni rubi'a didza', rëpa' lequë': Dë lu na'a gnaba' le gui'j gahua' le runa' dxin ni. <sup>5</sup>Lëzca' cni dë lu na'a utság ná'lena'-bi' bi'i ngul zanru' réjlë'bi' Cristo quië gunbi' neda' tsaxxón

ga rda', ca na' tunè' yezíca'rè' gbaz nasòlè'è Cristo len yugu' bönni' böch'è Xanru' len Pedro. <sup>6</sup>¿Naru' ráquili' tuza' neda' len Bernabé ral-la' guntu' dxin lahui' dza, quiè gdzólitu' le gágutu'? <sup>7</sup>¿Nuzxa caz bönni' rijè' gdil-l ati' rguizxjè' la' cuinzè'? ¿Nuzxa caz bönni' rudé'è tu la' yèl qui lba uva len cutu gahuè' le rbia lba na'? ¿Nuzxa caz bönni' ruyúè'-ba' bö'cu' zxila' len cutu gui'jè' nidxi' quecba'? <sup>8</sup>Cutu gáquili' la' neda'z ru'a cni didza'. Lèzca' cni rna le nayúj lu guich lu zxba queè' Moisés. <sup>9</sup>Lu zxba queè' Moisés nayúj lu guich, rna: “Cutu cu'u du rú'aba' bédx cati' rulibba' zxa' xtil.” Bè'è didza' ni Dios, clègz le rui' ladxè'è-ba' bédx, <sup>10</sup>san quiè uzi'ru' ca' xbey rè'u. Qui lè ni na' nayúj lu guich didza' na', ati' bönni' ruga'nè'-ba' bédx lenca' bönni' runè' ga tu'libba' zxa' xtil bédx, gropè' na' ral-la' lunè' löz la'zi'è qui le rulá' luyú na'. <sup>11</sup>Na'a, chqui' bentu' dxin ga zoali', le nac ca dxin guz gu'n, lè na' nac queè' Dios Bö' La'y, ¿naru' ráquitsali' cutu ral-la' uzi'tu' xbey tu le dau' dè queèli' ca na' ruzi'è xbey le rlapè' bönni' guz gu'n? <sup>12</sup>Tu'zì' xbey le dè queèli' yezica' bunách tu'zejni'i lbi'ili'. ¿Naru' cu rál-la'tèr uzi'tu' xbey netu' le dè queèli'?

Gatga buzi'tu' xbey lè ni dè lu na'tu', san bia' blentu' yúgu'tè quiè gac guntu' lban qui didza' dxi'a ca nac queè' Cristo. <sup>13</sup>Nózcicli' ca rac quegac nup tun dxin qui gdau', tu'zì' xbey gun qui gdau'. Lèzca' cni nup ta'gú'u lu bcugu la'y queè' Dios rön quecba' böa' bédx, tahuè' bèla' quecba' böa' bédx na'. <sup>14</sup>Lèzca' cni

nuzóè' Xanru' ca ral-la' gac quequè' bönni' tunè' lban qui didza' dxi'a. Ral-la' lugagu lequè' nup tu'zì' xbey lban na' tunè'. <sup>15</sup>Neda' gatga buzi'a xbey lè ni dè lu na'a, ati' lè ni ruzuja' lu guich ni cutu nac le rnabi nu bi gunn quia'. Run ba zxön cuina' le cunazxja' cati' runa' lban qui didza' dxi'a. Gué'ntèrda' gatia' ca gu'a latj nu gna runa' lban qui didza' dxi'a le nazxja'.

<sup>16</sup>Cutu dè lu na'a gun ba zxön cuina' le runa' lban qui didza' dxi'a, le run bayúdx guna' lban qui. Bica' bayechi' neda' chqui' cutu guna' lban qui didza' dxi'a. <sup>17</sup>La'naru' runa' lban le rè'nczda', huac gnaba' lazxja', san run bayúdx guna' lban, le nac tu le buspaguè'è neda' Dios guna'. <sup>18</sup>¿Bizxa lazxja' uzi'tsa' xbey chqui'nu'? Ruzi'a xbey le rdzag ladxa'a le cunazxja' cati' runa' lban qui didza' dxi'a. Cutu ca' ruzi'a xbey lè na' dè lu na'a le runa' lban qui didza' dxi'a.

<sup>19</sup>Na'a, zal-la' nutu nu yu'a lu nè'i, chben cuina' ca bönni' nada'lu quegac yúgu'tè bunách quiè gac guna' ga lulá ziantèr ca' bunách. <sup>20</sup>Cati' runa' lban laugac bunách judío, run cuina' ca bönni' judío quiè gac guna' ga lulá bunách judío na'. Bunách judío na' tun ca rna bè' zxba queè' Moisés. Qui lè ni na' run cuina' ca bönni' runè' ca rna bè' zxba na' zal-la' cutu yu'a lu na' zxba na'. Cni runa' quiè gac guna' ga lulá nup tun ca rna bè' zxba na'. <sup>21</sup>Cati' runa' lban laugac bunách gza'a, nup curná be'i leygac zxba queè' Moisés, run cuina' ca tu bönni' gza'a na', quiè gac guna' ga lulé'. Cutu ruca'na' ca'z zxba queè'

Dios. Neda' runa' ca rna bē' zxba queē' Cristo. <sup>22</sup>Run cuina' ca bōnni' cunác gdu ca rejlē'ē Cristo quiē gac guna' ga lulá nup na' cunác gdu ca ta'yejlē' Lē'. Run cuina' ca nacgac yúgu'tē bunách quiē gac guna' ga lulá la'gac bunách na'. <sup>23</sup>Lu yúgu'tē lē ni runa', runa' ga ta'yōni bunách didza' dxi'a, quiē gac uzi'a xbey tsazxón len lbi'ili' didza' dxi'a na'.

<sup>24</sup>Chnóziczli' ca tunē' bōnni' nútsa'quē' lu huitj. Ta'xíti'ē yúgu'tē', san gdél-li'nē' tuzē' bōnni' uzi'ē xbey latj blau. Lēzca' cni ral-la' gunli' xchinē' Dios, gacli' ca bōnni' nútsa'quē' lu huitj, quiē gdél-li'li' uzi'li' xbey le ubi'ē queēli' Dios. <sup>25</sup>Yúgu'tē bōnni', cati' tu'pá' cuinquē' quiē gac la'yaziē' lu huitj, ta'ná be'i cuinquē' lu yúgu'tē le tunē'. Tunē' cni quiē la'dél-li'nē' tu bregui' zin le nittē, san gdél-li'ru' rē'u tu le uzí'teczru' xbey. <sup>26</sup>Qui lē ni na', naca' neda' ca bōnni' gdu ladxē'ē rxíti'ē. Naca' ca' ca bōnni', gdu ladxē'ē rdil-lē', cutu rdi'a lu bō'z. <sup>27</sup>Ca runē' bōnni' rulidzē' bunách tsajtsazgac lu huitj, runa' ca' neda', runa' lban quiē lulá bunách. Bōnni' na' nutsē'ē lu huitj runē' ga gal gdu ca nayá' nabanē' len rna bé'inē' lei. Lēzca' cni runa' neda', cui unitia' xlatja' lu dxin queē' Dios.

Cutu tsej ládxi'ru' bdau'  
guiöj bdau' yag

**10** Rē'nda' uzéjni'da' lbi'ili', böchi' lza'adau', ca guc quequē' xuz xtau'tu'. Dios benē' ga glu'u xzul böaj yúgu'tē'. Lēzca' cni, guladödē' yúgu'tē' gatsj lahui'l nis zxön. <sup>2</sup>Lu böaj ni' len lu nis zxön ni', guc quequē' ca rac qui nu rdil nis.

Lē na' guc quequē' guc bē' glaquē' tuz len Moisés. <sup>3</sup>Lēzca' cni, glahuē' yúgu'tē' yōt xtildau' na' bunödzejē' quequē' Dios Bö' La'y. <sup>4</sup>Gli'jē' yúgu'tē' nis na' bunödzejē' quequē' Dios Bö' La'y, le gli'jē' nis bruj lē'i guiöj na' bulu'ē lahui Dios Bö' La'y, guiöj na' gulabáninē' lequē'. Ca guc guiöj na' nacczē' Cristo, nabániru' Lē'. <sup>5</sup>Zal-la' guc cni, cutu bdzag ladxē'ē yúgu'tē' Dios. Qui lē ni na' glatiē' lu latj ca'z.

<sup>6</sup>Yúgu'tē lē ni nac tu le ruzejni'i rē'u, cui sē ládxi'ru' le cunác, ca na' gulazé ládxi'quē' lequē'. <sup>7</sup>Cutu ral-la' tsej ládxi'ru' bdau' guiöj bdau' yag, ca na' glunē' la'quē' lequē'. Nayúj lu guich la'y, rna: “Gulabö'ē bōnni' ni', gli'j glahuē', ati' gulayasē', glunē' lni qui bdau' na'.” <sup>8</sup>Cutu ral-la' gunru' le cunác, ca na' glunē' le cunác la'quē' lequē', ati' tu dzaz glatiē' gdu ca tsonnáruá' milē'. <sup>9</sup>Cutu ral-la' si' bē'ru' Xanru', ca na' gulazí' bē'ē Lē' la'quē' lequē', ati' glatiē' le gláguya'aba' lequē' bēl snia'. <sup>10</sup>Lēzca' cni, cutu ral-la' gnēru' queē' Dios ca na' gulané' queē' la'quē' lequē', ati' busnitiē' lequē' tuē' gbaz la'y queē' Dios.

<sup>11</sup>Yúgu'tē lē ni guc quequē' xuz xtau'tu', tu'zejni'i rē'u, len nayúj lu guich la'y quiē gun gadxi rē'u, le chzoaru' dza chzoa udx qui yödzyú ni. <sup>12</sup>Qui lē ni na', nu raqui chnal, ral-la' gun chi'i cuini, cui gchixi gnigui. <sup>13</sup>Ca nac le ta'zí' bē' lbi'ili' rac ca' quegac yúgu'tē bunách. Dios runē' ca rnē' len cutu gu'ē latj bi si' bē' lbi'ili' le cugác gua' glenli', san cati' bi si' bē' lbi'ili', ului'inē' lbi'ili' nac gac grujli' lu na' tu' xōhui', quiē gac gua' glenli'.

<sup>14</sup>Qui lè ni na', böchi' lza'adau', cutu tsej láchxi'li' bdau' guiöj bdau' yag. <sup>15</sup>Ruí'lèna' lbi'ili' didza' ca ruí'lèna' didza' nup ta'yejni'i. Gul-bequi xbey didza' ni gu'a. <sup>16</sup>Cati' gnábiru'-nè' Dios gun la'yè' le ri'lju' cati' ruspanru' ca gutiè' Cristo, lè na' ri'lju' ruluí' nacru' tuz len Cristo le ruzi'ru' xbey le benè' Cristo cati' bulaljë' xchönè', gutiè' lè'i yag cruz. Lèzca' cni, yöt xtil na' ruzxuzxjru', ráguru', ruluí' dzagru'-nè' Cristo le ruzi'ru' xbey le benè' Cristo cati' budödè' uláz queëru' gdu ca nayá' nabanè'. <sup>17</sup>Zal-la' zianru' nacru', yúgu'tèru' ráguru' tuz yöt xtil na' len qui lè ni na' nacru' ca tuz bunách.

<sup>18</sup>Gul-yutsca' ca tunè' bönni' Israel. Bönni' ni' tahuè' lahuè' Dios le ta'gu'è lu bcugu la'y queè', lè na' tahuè' ruluí' dzagquè' Dios. <sup>19</sup>¿Bizxa rna didza' ni ru'a? Cutu rnia' nap yöl-la' huac bdau' guiöj bdau' yag, len cutu nap yöl-la' huac le ta'gú'u bunách laugac bdau' guiöj bdau' yag na'. <sup>20</sup>Cni rnia': Lè na' ta'gú'u laugac bdau' guiöj bdau' yag bunách cunúnbè'gac Dios, ta'gú'u laugac bö' xöhui', len clèg lahuè' Dios. Rè'nda' cutu gdzagli' yugu' bö' xöhui'. <sup>21</sup>Cutu gac gui'jli' le ruluí' nacru' tuz len Xanru' lenca' lè na' uluí' nacli' tuz len yugu' bö' xöhui'. Cutu gac gáguli' le ruluí' dzagru'-nè' Xanru', lenca' le uluí' dzagli' yugu' bö' xöhui'. <sup>22</sup>¿Naru' gúntsaru' ga uzxé'inè' Xanru'? ¿Naru' ráquitsali' náptèrli' yöl-la' huac ca napè' Lè'?

**Le dè lu na'ru' gunru' len ca ral-la' gdx'i'icru'-nè' böchi' lza'ru'**

<sup>23</sup>Nac gdu'tè li didza' na' rna: "Yúgu'tè dè lu na'ru' gunru'." Na'a,

neda' rnia': Clèg yúgu'tè ral-la' gunru'. Yúgu'tè dè lu na'ru' gunru', san clèg yúgu'tè gun ga gacr gdu ca réjlè'ru' Cristo. <sup>24</sup>Ral-la' güi' láchxi'ru' gunru' le gun ga gac dxi'a quequè' böchi' lza'ru', len clègz le gun ga gac dxi'a qui la' cuinzru'.

<sup>25</sup>Bíti'tèz bi tuti' bunách lu yè'ly, huac gáguli', len cutu bi ral-la' gnabli' qui, cui cuequi bagu'í láchxi'dau'li'. <sup>26</sup>Nayúj lu guich le rna: "Queè' Xanru' naqui yödzyú ni, lenca' yúgu'tè le dè yödzyú ni."

<sup>27</sup>Chqui' ulidzè' lbi'ili' bönni' curejlè'è Dios guidli' lidxè', ati' gué'nili' tseajli', gul-gagu yúgu'tè le gdxie' lauli', len cutu bi gnabli' qui, cui cuequi bagu'í láchxi'dau'li'. <sup>28</sup>Chqui' nútí'tèz nu guiè lbi'ili': "Lè ni gulagu'è lau bdau' guiöj bdau' yag", cutu gáguli' lè na' quiè gac dxi'a qui nu na' gdxijöi' cni lbi'ili', len cui cuequi bagu'í láchxi'dau'huè'. <sup>29</sup>Rnia': "Cui cuequi bagu'í láchxi'dau'huè' bönni' na' gdxijöi'nè' cni lbi'ili'", len clèg cui cuequi bagu'í láchxi'dau'li' lbi'iczli'.

Nazx ca' nu gnabi neda', gna: "¿Bizx quiè ral-la' uzó'a' tsla'l le dè lu na'a guna' le rbequi bagu'í láchxi'dau'huè' bönni' yubl?" <sup>30</sup>Huac gna ca' nu na': "Chqui' gyèpa'-nè' Dios: Xclenu', ni'a qui lè na' rahua', ¿bizx quiè nu uquí neda' ni'a qui lè na' rahua'?" <sup>31</sup>Chqui' bi gáguli' o bi gui'jli', o bítí'tèz bi gunli', gul-gún yúgu'tè quiè gac queè' Dios yöl-la' ba. <sup>32</sup>Cutu bi gunli' le gun ga la'chixi la'nigui bunách judío, len cutu gunli' le gun ga la'chixi la'nigui bunách cunacgac judío, len cutu gunli' le gun ga la'chixi la'nigui bunách

queë' Dios. <sup>33</sup>Gul-gún ca runa' neda', rui' ladxa'a guna' le la'dzág ládxi'gac yúgu'të bunách, len cutu rui' ladxa'a guna' le uzi'a xbey la' neda'z, san le luzí' xbey yezica' bunách quië lulá.

**11** Gul-gún ca runa' neda', ca na' neda' ca' runa' ca benë' Cristo.

**Le tunnu ngul laugac  
bunách queë' Cristo**

<sup>2</sup>Runa' lbi'ili' zxön, böchi' lza'adau', le rajnéyteczli' neda', len nazí' lu na'li' zxba budöda' lu na'li'. <sup>3</sup>Na'a, rë'nda' tséjni'li' rna bé'inë' yúgu'të bönni' Cristo, ati' bönni' rna bé'inë'-nu ngul, ati' Dios rna bé'inë' Cristo. <sup>4</sup>Chqui' rulidzë' Dios bönni' o ru'ë didza' uláz queë' Dios, len dxia icjë' xlu'ë, ruca'në' ca'z Cristo. <sup>5</sup>Na'a, chqui' rulidznu Dios ngul o rui'nu didza' uláz queë' Dios len cutu bi zxoá icjnu, ruca'nnu ca'z bönni' queënu, len nac queënu ca nac queënu ngul narugu guitsa' icjnu. <sup>6</sup>Chqui' cutu bi zxoá icjnu ngul, ral-la' grugu ca' guitsa' icjnu. Chqui' gun ga utui'nu ngul na' chqui' nu gchugu guitsa' icjnu, ral-la' bi gxoá icjnu. <sup>7</sup>Cutu bi ral-la' udxía icjë' bönni' cati' rdxinë' lahuë' Dios, le naquë' ca nacczë' Dios ati' lë na' naquë' bönni' ruluí' lahui yöl-la' zxön queë' Dios, san le nacnu ngul na' ruluí' lahui yöl-la' zxön queë' bönni' queënu. <sup>8</sup>Cati' benë' bunách Dios, cutu bubijë' bönni' na' lu ngul. Ngul na', lu bönni' na' bubijë'-nu. <sup>9</sup>Lëzca' cni, cutu benë' bönni' Dios quië uzi'nu xbë' ngul, san ngul quië uzi'ë xbanu bönni' benë'-nu. <sup>10</sup>Qui lë ni

na', ral-la' gxoá icjnu ngul na' le ruluí' zoa nu rna be'i lënu le tu'yúé' rë'u gbaz la'y queë' Dios. <sup>11</sup>Na'a, lahuë' Xanru', rquíninë'-nu ngul queë' bönni', ati' rquíninu-në' bönni' queënu ngul. <sup>12</sup>Ca na' benë' Dios, bubijë'-nu ngul lu bönni', lëzca' cni na'a, náljlenë'-nu ngul bönni', ati' yúgu'të r-ruj lu në'ë Dios.

<sup>13</sup>Gul-bequi xbey la' lbi'izli'. ñNaru' ral-la' ulidznu-në' Dios ngul cutu bi zxoá icjnu? <sup>14</sup>ñNaru' cu rusëdi lbi'ili' yöl-la' nacz quegac bunách, ral-la' utui'në' bönni' na' ru'ë latj gtunn guitsa' icjë'? <sup>15</sup>Na'a, chqui' natúnn guitsa' icjnu ngul, nac yöl-la' lach queënu, le bë'ë queënu Dios guitsa' icjnu quië uspín icjnu. <sup>16</sup>Chqui' zoa nu guë'ni tá'bagá didza' ni, cniz nazí' lu na'tu' runtu', len la' tuz ca tun yugu' cö' bunách queë' Dios.

**Tu'cá'n ca'z le ri'j ráguru' ruspanru'  
ca gutië' Xanru' bunách Corinto**

<sup>17</sup>Cutu ba la'n runa' lbi'ili' ca nac le uzéjni'da' lbi'ili' na'a. Cutu run ga rac dxia queëli' le runli' cati' rudubli' queë' Cristo, san run ga rac queëli' le cunác dxia'. <sup>18</sup>Rzu lahua' ruzéjni'da' lbi'ili' lë ni ta'guixjöi' neda' bunách, ta'ná: "Cati' rudubli' queë' Cristo, narujli' chopl", ati' réjlë'a nazx ca' nac cni. <sup>19</sup>Run bayúdx la'cua'len lbi'ili' nup tu'sëdi le cunác quië lac bë' nup nacgac gdu bunách queë' Cristo. <sup>20</sup>Qui lë ni na', cati' rudubli', lë na' ráguli' tsaxxón cutu nac le ri'j ráguru' ruspanru' ca gutië' Xanru'. <sup>21</sup>Cni nac, le runli' bayúdx tu tuli' ráguli' le nua'li' qui queëli' cati' ráguli' tsaxxón, ati' qui lë ni na'

rdunli' la'li' ati' yela'li' ri'lj ráguli'  
ga rdxintè rzúdxili'. <sup>22</sup>¿Naru' cu  
zoa lidxli' ga huac gui'lj gáguli'?'  
Ca na' runli', ruca'nli' ca'z bunách  
queè' Dios, len runli' ga tu'tu'í nup  
cutu bi dè quegac. ¿Bizxa caz gyèpa'  
lbi'ili'?' ¿Naru' guntsa' lbi'ili' ba  
la'n? Cutu ca' runa' lbi'ili' ba la'n ca  
nac lè ni runli'.

**Le ri'lj ráguru' ruspanru'  
ca gutiè' Xanru'**

<sup>23</sup>Xanru'cz budödè' lu na'a lè  
na' busèdda' lbi'ili', ca na' benè'  
Xanru' Jesús yèl ni' cati' nu budód  
Lè' lu na'què' bönni' guludödè' Lè'.  
Gdel-lè'è yöt xtil, <sup>24</sup>len cati' budx  
gudxè' Dios: "Xclenu'", buzxuzxjè'  
lei len gnè': "Gul-gagu. Lè ni  
nac xpèla'a le nuzxj uláz queèli'.  
Gul-gún cni, uspanli' ca gac quia'  
neda'." <sup>25</sup>Lèzca' cni, gdöd glahuè',  
gdel-lè'è zxíga'dau' len gnè': "Le  
yudzu zxíga'dau' ni nac xchöna', le  
run tsutsu didza' cub rucá'n tsahui'.  
Gul-gún cni yúgu'tè lzu gui'lji' lei,  
uspanli' ca gac quia' neda'." <sup>26</sup>Cni  
gac ga gdxintè dza huödè' Xanru',  
yúgu'tè lzu gáguli' yöt xtil cni len  
gu'íjili' zxíga'dau' cni, ului'li' lahui  
ca gutiè' Xanru'.

**Ca ral-la' gunru' cati' gui'lj gáguru',  
uspanru' ca gutiè' Xanru'**

<sup>27</sup>Qui lè ni na', núti'tèz nu gagu  
yöt xtil ni o gui'lji' zxíga'dau' ni  
queè' Xanru', len cutu run lei ba  
la'n, nabaga' zxguia' nu na', le run  
dul-la', rucá'n ca'z xpèlè'è Xanru'  
lenca' xchönè'. <sup>28</sup>Qui lè ni na', ral-la'  
cuequi xbeyru' la' cuinzru' tu turu',  
ati' ni'r huac gáguru' yöt xtil ni, len  
gu'íjiru' zxíga'dau' ni. <sup>29</sup>Núti'tèz

nu ri'lj ragu lè ni len cutu run lei ba  
la'n le cutu ráquibe'i rulu' le guc  
queè' Xanru', ruspaga' cuini dul-la'  
ni'a qui lè na' rè'lj ragu. <sup>30</sup>Qui lè ni  
na' te'i zian nup dzaggac lbi'ili', len  
ta'cuídi'nè', ati' zianquè' chnatquè'.  
<sup>31</sup>La'naru' cuequi xbeyru' la'  
cuinzru', cutu cuequi xbeynè' rè'u  
Xanru'. <sup>32</sup>Chqui' gun bayúdx cuequi  
xbeynè' rè'u Xanru', usaca' zi'è rè'u,  
cui grugu queèru' cati' gchuguè'  
quegac bunách yödzyú.

<sup>33</sup>Qui lè ni na', böchi' lza'adau',  
cati' udubli' quiè gui'lj gáguli',  
uspanli' ca gutiè' Xanru', gul-cóz  
tuli' yetuli'. <sup>34</sup>Chqui' zoa nu rdun,  
ral-la' gagu nu na' ga nac lu yu'u  
lidx, cui gun bayúdx cuequi xbeynè'  
lbi'ili' Dios cati' udubli'. Nacuá'  
yela'gac le runli', san uca'na' tsahui'  
yugu' lè na' cati' duyúa' lbi'ili'.

**Yöl-la' huac runnè' queèru'  
Dios Bö' La'y**

**12** Na'a, böchi' lza'adau',  
rè'nda' tséjni'li' ca nac  
yöl-la' huac runnè' queèru' Dios Bö'  
La'y.

<sup>2</sup>Nóziczli' ca guc cati' ni'  
curéjlè'nili' Cristo, bè'li' latj  
gulaché' lbi'ili' ga yubl bunách.  
Gyij ladxli'li' bdau' guiöj bdau' yag  
cuta'né. <sup>3</sup>Qui lè ni na', ruzéjni'da'  
lbi'ili' cni, rnia': Ladj yúgu'tè nup  
tui' didza' uláz queè' Bö' La'y queè'  
Dios, nutu nu gac gnè xöhui' queè'  
Jesús, len nutu nu gac gna: "Jesús  
naquè' Xanru'", chqui' cuzóalenè'  
nu na' Dios Bö' La'y.

<sup>4</sup>Na'a, nadza'gac tu tu le runnè'  
queèru' Dios Bö' La'y, san tuzè'  
naquè' Bö' La'y na'. <sup>5</sup>Lèzca' cni,  
nadza'gac tu tu dxin rgu'è lu na'ru'



Xanru', san tuzè' naquè' Xanru' na'.  
 6Nadza'gac ca' tu tu yòl-la' huac  
 napru' le rúniru' xchinè' Dios, san  
 tuzè' naquè' Dios, runnè' queèru'  
 yòl-la' huac na'. 7Dios runnè' qui  
 queèru' tu le nac bè' napru' yòl-la'  
 huac queè' Dios Bò' La'y, lè na'  
 ruzi'ru' xbey yúgu'tèru'. 8Dios  
 Bò' La'y runòdzjè' queè' tu bònni'  
 yòl-la' huac ru'è didza' len yòl-la'  
 rac sxzöni, ati' yetúè' bònni', Lèczè'  
 Bò' La'y runòdzjè' queè' yòl-la'  
 huac ru'è didza' lu yòl-la' rejni'i.  
 9Lèzca' cni, Lèczè' Dios Bò' La'y  
 na' runòdzjè' queè' yetúè' bònni'  
 yòl-la' rejlé' Cristo bi gunè', ati'  
 yetúè' bònni' runòdzjè' queè' yòl-la'  
 huac ruúnè' nup te'i. 10Yetúè' bònni'  
 runòdzjè' queè' yòl-la' huac runè'  
 yugu' yòl-la' huac qui yehua' yubá,  
 ati' yetúè' bònni' ru'è lè' latj ru'è  
 didza' uláz queè' Dios, ati' yetúè'  
 bònni' runòdzjè' queè' yòl-la' huac  
 ráquibe'linè' chqui' bò' dzag bunách  
 naqui queè' Dios o naqui qui tu'  
 xòhui'. Runòdzjè' queè' yetúè'  
 bònni' yòl-la' huac ru'è didza' yubl  
 cunazèdè', ati' queè' yetúè' bònni'  
 yòl-la' huac rudödè' didza' yubl  
 na' cunazèdè'. 11Yúgu'tè lè ni runè'  
 Lèczè' Dios Bò' La'y, le runòdzjè'  
 qui tu tu bunách tsca rè'ncznè'.

#### Yúgu'tèru' nacru' ca tuz bunách

12Ca na' nac tuz gdu ca nayá'  
 nabinru', zal-la' zian le nagudi'  
 dzáglenru', ati' le zian na' nagudi'  
 dzáglenru' nacgac tuz le nayá'  
 nabinru', lèzca' cni nac queè' Cristo.  
 13Le zóalenè' rè'u Lèczè' Dios Bò'  
 La'y, lè ni nac queèru' ca tu le  
 nadilru' nis, le nac bè' nacru' ca  
 tuz bunách, zal-la' nacru' yugu'

bònni' judío, len yugu' bònni' gza'a,  
 lenca' bònni' nadá'ugac, len bònni'  
 cunadá'ugac. Yúgu'tèru', Dios bè'è  
 rè'u latj si'ru' le runòdzjè' Lèczè' Bò'  
 La'y.

14Na'a, lu gdu ca nayá' nabinru',  
 zian le nagudi' dzáglenru' len clèg  
 tuz. 15La'naru' huac güi' didza'  
 ní'aru', huaná: "Le cutu naca'  
 nè'è bònni', cutu náquida' queè'",  
 didza' ni cutu gun ga cutu naqui  
 queè' bònni' na'. 16La'naru' huac  
 güi' didza' nagru', huaná: "Le cutu  
 naca' yøj lahuè', cutu náquida'  
 queè' bònni' ni", didza' ni cutu  
 gun ga cutu naqui queè' bònni' na'.  
 17La'naru' nac yøj lauru' gdutè le  
 nayá' nabinru', ñnaxc gac yóniru'?  
 La'naru' nac nagru' gdutè, ñnaxc  
 gac gle'zi xzína'ru'? 18Na'a, Dios  
 nucu'è yúgu'tè le nagudi' dzáglenru'  
 ca gu'ncznè' Lè'. 19La'naru' nac tuz  
 le nagudi' dzáglenru', cutur soa gdu  
 ca nayá' nabinru'. 20Na'a, ca nacru',  
 zian le nagudi' dzáglenru', san tuz  
 le nacru'.

21Qui lè ni na', cutu gac guiè  
 na'ru' yøj lauru', gna: "Cutu  
 rquinda' lí'." Lèzca' cni, cutu gac  
 guiè ní'aru' icjru', gna: "Cutu  
 rquinda' lbi'ili'." 22Na'a, yugu' le  
 nagudi' dzáglenru', lè na' ráquiru'  
 nacgac cuidi'z, lè ni naquínir-ru'.  
 23Lèzca' cni, yugu' le nagudi'  
 dzáglenru' le ráquiru' nacgac ca'z,  
 lè ni rugácur-ru' dxi'a, len yugu'  
 le ráquiru' cutu ral-la' gla' lahui,  
 rugácur-ru' ca' dxi'a. 24Cutu run  
 bayúdx gunru' cni qui le nacr lach  
 qui le náquiniru'. Dios benè' gdu ca  
 nayá' nabinru', len benè' ga nacr  
 lsaca' lè na' ráquiru' rè'u nacr ca'z.  
 25Cni benè', ati' cutu narujgac chopl

le nagudi' dzáglenru', le tun chi'i lza'gac tu yetú. <sup>26</sup>Chqui' gac zi' tu le náquiniru', lac zi' tsaxón len lei yúgu'tè le náquiniru' na', len chqui' tu le náquiniru', zoa bi ruzí' xbey, yúgu'tè le náquiniru' tu'zí' xbey tsaxón len lei.

<sup>27</sup>Na'a, lbi'icli' dzagli' gdu ca nayá' nabanè' Cristo, ati' tu tuli' nacli' ca yugu' le nagudi' dzáglenè'. <sup>28</sup>Lèzca' cni, ladj bunách queè' Cristo, Dios nucu'è nup tun xchinè'. Ga nac zi'a nucu'è bönni' gbaz queè' Cristo. Ga nac buróp nucu'è bönni' tu'è didza' uláz queè', len ga bunn'tè nucu'è bönni' tu'sèdi, ati' ni'r nucu'è nup tun yugu' yöl-la' huac qui yehua' yubá. Ni'r nucu'è nup tu'ún nup te'i. Ni'r nucu'è nup taclen böchi' lza'ru'. Ni'r nucu'è bönni' tu'lui'inè' rë'u dxin gunru'. Ni'r nucu'è bönni' tu'è didza' yubl cunazèdquè'. <sup>29</sup>Clèg yúgu'tè' nacquè' gbaz queè' Cristo. Clèg yúgu'tè' tu'è didza' uláz queè' Dios. Clèg yúgu'tè' tu'sèdnè'. Clèg yúgu'tè' tunè' yugu' yöl-la' huac qui yehua' yubá. <sup>30</sup>Clèg yúgu'tè' dè lu na'què' luúnè' nup te'i. Clèg yúgu'tè' tu'è didza' yubl cunazèdquè'. Clèg yúgu'tè' tu'dödè' didza' yubl cunazèdquè'. <sup>31</sup>Gul-güi' ládxi'li' cu'è lu na'li' Dios yugu' yöl-la' huac na' nacgacr lsaca'. Na'a, ului'ida' lbi'ili' tu le nacr lsaca' ca yúgu'tè' lè ni.

### Yöl-la' nadxí'i

**13** Zal-la' gac gu'a xtídza'gac bunách le cunazèda', lenca' xtídza'què' gbaz la'y queè' Dios, san chqui' cunadxi'ida' lza'a, didza' gu'a cutu gacr lsaca' ca bö run gui

rucödixru' o guia rutil-lru' lzè'i.

<sup>2</sup>Zal-la' dè lu na'a gu'a didza' uláz queè' Dios len tséjni'da' yúgu'tè le nagachi', len yúgu'tè didza' rejni'i, len zal-la' nac gdu ca réjlè'a Dios ga rdxintè huac cúa' yugu' gui'a, san chqui' cunadxi'ida' lza'a, cutu bi lsaca' naca'. <sup>3</sup>Zal-la' quisia' gdutè le dè quia' ugahua' bunách yechi', len zal-la' udöda' gdu ca nayá' nabana' ga luzegui' lei bunách le réjlè'a Cristo, san chqui' cunadxi'ida' lza'a, cutu ca' uzi'a xbey lè na' runa'.

<sup>4</sup>Nu bönni' nadxí'inè' lzè'è, rbözè' zxön ladxi'. Naquè' dxi'i ladxi' len cutu ruzxé'inè' lzè'è. Bönni' na' nadxí'inè' lzè'è cutu run ba zxön cuinè', len cutu run cuinè' blau. <sup>5</sup>Bönni' na' nadxí'inè' lzè'è cutu runè' le cunác, len cutu rudúl-li'nè' le dè queè', len cutu rléytenè', len cutu rajneynè' dö' glui' queè' bunách. <sup>6</sup>Bönni' na' nadxí'inè' lzè'è cutu ca' rudzijnè' cati' nu run le cunác. Rudzijnè' cati' nu run le nac gdutè li. <sup>7</sup>Bönni' na' nadxí'inè' lzè'è rua' rlenè' bíti'tèz bi gun queè' lzè'è, len réjlè'teczè' lzè'è, len rúnteczè' löz gun le nac dxi'a lzè'è, len rbóteczè' zxön ladxi'.

<sup>8</sup>Cutur töd qui yöl-la' nadxí'i. Huadód qui le dè lu na'gac bunách lui' didza' uláz queè' Dios. Huadxín dza cati' cutur gata' lu na'gac bunách lui' didza' yubl cunazèdgac, ati' huadód qui yöl-la' rejni'i quegac bunách. <sup>9</sup>Lati'z réjni'ru' na'a, len lati'z ca' rui'ru' didza' uláz queè' Dios. <sup>10</sup>Cati' gdxin le nac gdu, ni'r udx qui lè na' nac lati'z.

<sup>11</sup>Cati' ni' naca' bi'idau', bè'a didza' ca bi'idau', len glequi icja' ca bi'idau', len gza' ladxa'a ca bi'idau'.

Cati' gzxöna' buca'na' le naqui qui bí'idau'hua'. <sup>12</sup>Na'a le rlé'iru' nacx ca le rlé'iru' cati' ruyú cuinru' tu lu guía dxildau'. Cutu rlé'iru' gdu ca nac. Dza ni'r glé'iru' gdu ca nac yúgu'tè. Na'a núnbè'a lati'z. Dza ni'r gúnbè'a yúgu'tè ca na' Dioscz nunbè'è neda'. <sup>13</sup>Na'a, nacula'tecz yöl-la' rejlè' queèru' Dios, len yöl-la' run löz queèru' Dios, len yöl-la' nadxí'i queèru' lza'ru'. Nacuá' yonn ni, san le nac blau nac yöl-la' nadxí'i.

**Yöl-la' huac runnè' queèru'  
Dios Bö' La'y**

**14** Gul-gún bayúdx gdxí'ili' lza'li' len gul-güi' ládxi'li' si'li' ca' yugu' yöl-la' huac runnè' queèru' Dios Bö' La'y, len le nac blau, yöl-la' huac güi'li' didza' uláz queè' Dios. <sup>2</sup>Nu rui' didza' yubl cunazéd, clég bunách rui'len didza' nu na'. Dios rui'len didza' nu na', le nutu nu zoa rejni'i didza' rui' nu na'. Dios Bö' La'y ru'è nu na' latj rui' didza' ca nacgac le nagachi' queè' Dios. <sup>3</sup>Nu na' rui' didza' uláz queè' Dios, rui'len bunách didza' quiè gacr gdu ca ta'yejlè' Cristo. Rutíp ládxi'què' len ruhuí' zxön lequè'. <sup>4</sup>Nu na' rui' didza' yubl cunazéd run tsutsu la' cuinz, san nu rui' didza' uláz queè' Dios run tsutsu yúgu'tè bunách queè' Cristo.

<sup>5</sup>Rac ladxa'a güi'li' didza' yubl cunazédli' yúgu'tèli', san le nac blau, rè'nda' güi'li' didza' uláz queè' Dios. Ruzi'r-ru' xbey nu rui' didza' uláz queè' Dios ca ruzi'ru' xbey nu rui' didza' yubl cunazéd, chqui' cuzóa nu udód didza' yubl na' cunazéd, quiè lac tsutsu bunách

queè' Cristo. <sup>6</sup>Qui lè ni na', böchi' lza'adau', cati' guida' ga zoali', chqui' güi'lena' lbi'ili' didza' yubl cunazèda', cutu bi uzi'li' xbey. Uzi'li' xbey tuz didza' na' güi'lena' lbi'ili' le nului'inè' neda' Dios, o didza' uzejni'i rè'u, o didza' gu'a uláz queè' Dios, o le nac zxba queè'.

<sup>7</sup>Lèzca' cni rac qui le ta'gú'u bö, yugu' le cunabangac, ca nac gui rucödxru', o ca nac guitarra, chqui' cutu tul-l ca ral-la' lun, ñnacxzc gúnbè'ru' bizxal le tul-l na', lè na' rul-l gui na' o guitarra na'? <sup>8</sup>Chqui' cutu cödx ca ral-la' gun trompeta na' ulídz rè'u lu gdil-l, ñnuzxa caz upá' cuini tseaj lu gdil-l na'? <sup>9</sup>Lèzca' cni rac queèli'. Chqui' len lúdxi'li' güi'li' didza' le cutác bunách, cutu ca' la'yejni'i didza' güi'li'. Cni gac, daduz güi'li' didza'. <sup>10</sup>Le nactè yödzlyú ni nacué' zian didza' yubl tui' zian cö' bunách gza'a, ati' nacué' bunách ta'yejni'i tu tu didza' na'. <sup>11</sup>Na'a, chqui' cutu réjni'da' didza' ru'è bönni', gaca' ca bönni' gza'a lahuè' bönni' na' ru'è didza', ati' bönni' na' ru'è didza' gaquè' ca' lahua' neda' ca bönni' gza'a. <sup>12</sup>Lèzca' cni nac queèli'. Rui'tsca ládxi'li' si'li' yugu' le runnè' queèru' Dios Bö' La'y. Qui lè ni na', gul-güi' ládxi'li' si'li' yugu' le lun ga lacr tsutsu bunách queè' Cristo.

<sup>13</sup>Qui lè ni na' ca', nu rui' didza' yubl cunazéd ral-la' ulídz Dios gnabi Lè' gunnè' qui yöl-la' huac quixjö' le rè'ni gna didza' na' rui' nu na'. <sup>14</sup>Cati' rulidza'-nè' Dios, chqui' ru'a didza' yubl cunazèda', lu bö' naccza' rulidza'-nè' Dios, san le cutu réjni'da' didza' ru'a, lu yöl-la' rejni'i quia' cutu ruzi'a xbey didza'

na' ru'a. <sup>15</sup>¿Nacxcz ral-la' guna' chqui'nu'? Ulidza'-nè' Dios lu bö' naccza', lenca' lu yöl-la' rejni'i quia' ulidza'-nè' Dios. Gul-la' yöl-la' ba lu bö' naccza' lenca' lu yöl-la' rejni'i quia' gul-la' yöl-la' ba. <sup>16</sup>Chqui' tuz lu bö' nacczu' rulídz la'yu'-nè' Dios, ati' zoa ni' nu ryöniz, san chqui' cutu rejni'i didza' ru'u, ¿nacxcz gac gna: "Ca' gac", ni'a qui didza' ru'u, rè'u-nè' Dios: "Xclenu'"? <sup>17</sup>Nazx ca' dxí'adau' ru'u didza', rè'u-nè' Dios: "Xclenu'." Chqui' cutu rejni'i didza' ru'u, cutu bi uzí' xbey nu na' ryöni. <sup>18</sup>Rèpa'-nè' Dios: Xclenu', le rui'ra' didza' yubl cunazèda' ca yúgu'tèli'. <sup>19</sup>Laugac bunách queè' Dios gué'ntèrda' gu'a gayu'z didza' le gac la'yejni'i bunách ca zian gayuá' didza' yubl cunazèda' ati' nutu nu gac tsejni'i. Gac usèdda' yezica' bunách tuz chqui' la'yejni'i didza' gu'a.

<sup>20</sup>Böchi' lza'adau', cutu gacli' ca bi'idau' ca nac le rza' ládxi'li'. Gul-gác ca bi'idau' cui gunli' le cunác, san gul-gác bönni' chnacgac ca nac le rza' ládxi'li'. <sup>21</sup>Nayúj lu guich la'y, rna: "Len didza' yubl len lu rú'agac bunách gza'a güi'lèna' bunách ni didza'. Zal-la' guna' cni, cutu luzé naggac xtidza'a." Cni rnè' Xanru'. <sup>22</sup>Cni nac, Dios ru'è rè'u latj rui'ru' didza' yubl cunazèdru' quiè gac tu le nac bè' laugac bunách cuta'yejlè' len clèg laugac nup ta'yejlè' Cristo. Ru'è rè'u latj rui'ru' didza' uláz queè' Lè' le luzí' xbey nup ta'yejlè' Cristo len clèg bunách na' cuta'yejlè'. <sup>23</sup>Qui lè ni na', cati' udubli' tsaxón, yúgu'tèli' na' náquili' queè' Cristo, chqui' güi'li' didza' yubl cunazèdli' yúgu'tèli',

ati' tsazgac nup nazèdgac lati'z o nup cuta'yejlè' Cristo, ¿naru' cu la'ná: "Nachixi icjli'"? <sup>24</sup>Na'a, chqui' yúgu'tèli' güi'li' didza' uláz queè' Dios, ati' tsaz nu curejlè' Cristo o nu nazéd lati'z, gáquibe'i nu na' nabaga' zxguia' ati' Dios cuequi xbeynè' lè'. Cni gáquibe'i nu na', le yöni didza' güi'li' yúgu'tèli'. <sup>25</sup>Gáquibe'i ca nac le rza' ladxi' nu na', lè na' bgachi', ati' uzechu zxib nu na' len tsej ladxi' Dios, gna: "Le nactè Dios zóalenè' lbi'ili'."

#### Ca ral-la' gunru' ga rudubru' queè' Cristo

<sup>26</sup>Qui lè ni na', böchi' lza'adau', cati' rudubli' queè' Cristo, rul-lè' tu salmo tuè' bönni' dzaguè' lbi'ili', ati' rusèdnè' tu zxba yetué', ati' rguíxjöi'nè' lbi'ili' tu le bului'inè' lè' Dios yetué', ati' ru'è didza' yubl cunazèdè' yetué', ati' rudödè' didza' yubl na' cunazèdè' yetué'. Yúgu'tè le gunli' ral-la' gac le luzí' xbey nup tu'dúb queè' Cristo. <sup>27</sup>Cati' nacuá' ni' nup tui' didza' yubl cunazèdgac, cutu ral-la' güi'li' didza' cni zianr ca chop tsonnzli'. Huac gu'è didza' tuzè' bönni' na', ati' töd na' huac gu'è didza' yetué', san run bayúdx soa nu udód didza' yubl na' cunazèdli'. <sup>28</sup>Chqui' nutu nu zoa nu gac udód didza' yubl na' cunazèdli', ral-la' soa dxiz ga na' nudubli' nu na' rui' didza' yubl cunazéd, ati' huac güi'lenè' Dios didza' na' lu icj ládxi'dau'huè'. <sup>29</sup>Lèzca' cni, bönni' tu'è didza' uláz queè' Dios ral-la' lu'è didza' chop tsonnzè', ati' yezica'rè' bönni' na' tu'è didza' uláz queè' Dios ral-la' la'bequi xbeynè' didza' ru'è bönni' na'. <sup>30</sup>Chqui' Dios

ului'inè! tu bönni' rō'è ni' le rē'ni gna xtidzē'è, ral-la' soa dxiz nu na' rui' didza'. <sup>31</sup>Yúgu'tèli' huac güi'li' didza' uláz queè' Dios tu tuli' quiè gzèdli' yúgu'tèli' len gdip lādxi'li' ca' yúgu'tèli'. <sup>32</sup>Bönni' tu'è didza' uláz queè' Dios huac la'ná be'i cuinquè', la'cu'è dxiz. <sup>33</sup>Clèg Dios nu run ga runru' rusbó, le rē'nnè' Lè' gacru' ba'a ladxi', ca na' runè' ga nacua' yúgu'tè cō' bunách queè' Cristo.

<sup>34</sup>Ral-la' la'cua'nu dxiz ngul queèli' ga na' rudubli'. Cutu dè lu na'cnu lui'nu didza' ni'. Ral-la' la'cua'nu nöxj ca na' rna bè' zxba queè' Dios. <sup>35</sup>Chqui' té'ninu la'yéjni'nu lati', ral-la' la'nábinu bönni' qui queècnu cati' ni' nacu'è lidxquè'. Cutu ral-la' lui'nu didza' ngul ga na' tu'dubè' queè' Dios.

<sup>36</sup>¿Naru' ráquitsali' bunödzejè' xtidzè'è Dios lu rú'ali' lbi'izli'? ¿Naru' ráquitsali' bdxin queèzli' xtidzè'è Dios? <sup>37</sup>Chqui' nutsè'è ladjli' bönni' ráquinè' ru'è didza' uláz queè' Dios, o ráquinè' zóalenè' lè' Dios Bō' La'y, bönni' ni ral-la' si' lu nè'è nac zxba queè' Xanru' le ruzuja' queèli' lu guich ni. <sup>38</sup>Na'a, chqui' cutu rui' ladxè'è didza' ni, cutu güi' lādxi'li'-nè' bönni' na'.

<sup>39</sup>Qui lè ni na', böchi' lza'adau', gul-güi' lādxi'li' güi'li' didza' uláz queè' Dios, len cutu gna bé'ili' nu rui' didza' yubl cunazéd. <sup>40</sup>Yúgu'tè ral-la' gunru' ca sa'yéaj, len ca rajlóz yöl-la' ba'a ladxi'.

#### Bubanè' Cristo lu yöl-la' gut

**15** Na'a, böchi' lza'adau', rguíxjöi'da' lbi'ili' ca nac didza' dxi'a na' bena' lban qui ga

zoali', lè na' gzxi' lu na'li' len run ga nacr gdu ca réjlè'li' Cristo. <sup>2</sup>Ni'a qui didza' ni ulali', chqui' gunli' ca rna didza' dxi'a na' bena' lban qui ga zoali', chqui' le nactè gyéjlè'li' Cristo.

<sup>3</sup>Ga gzu lau budöda' lu na'li' le budödè' Dios lu na'a neda'. Cni rna: “Gutiè' Cristo uláz queèru' le nabága'ru' dul-la'.” Ca nac lè ni nayúj lu guich la'y, ben bayúdx benè'. <sup>4</sup>Rna ca: “Bgachè'è yeru ba, len cati' bza'a tsonn dza, bubanè' lu yöl-la' gut”, ca na' nayúj ca' lu guich la'y, ben bayúdx guc queè'. <sup>5</sup>Gdöd ni' buluí' lahuè' Cristo, blé'linè' Lè' Pedro, len gdöd ni', gulalé'inè' Lè' idxínnutè' gbaz queè'. <sup>6</sup>Ni'r buluí' lahuè' lauquè' zianr ca gayu' gayu'è böchi' lza'ru' ta'yejllè'è Cristo, cati' ni' nudubquè' tsaxón. Yelati'z cuguluhuöatè' böchi'ru' ni nacu'è nabanquè' na'a, zal-la' la'què' chnatquè'. <sup>7</sup>Ni'r blé'linè' Lè' Jacobo, len gdöd ni' buluí' lahuè' lauquè' yúgu'tè bönni' gbaz queè'.

<sup>8</sup>Ga yajseytè buluí' lahuè' ca' lahua' neda'. Ca guc lè ni, naca' ca bi'idau' guljbi' cati' chgdöd dza ral-la' galjbi'. <sup>9</sup>Cni nac, le nacra' neda' cuidi'z ca yúgu'tè bönni' gbaz queè', len cutu naca' neda' lsaca' si' la' gbaz queè', le gdxia ladxa'a bunách queè' Dios. <sup>10</sup>Na'a, le buzá' ladxè'è quia' Dios naca' le naca' na'a, len clèg daduz buzá' ladxè'è quia'. Béntèra' xchinè' ca yezíca'rè' gbaz queè', zal-la' clèg racz quia' bena' dxin na'. Dioscz, lu yöl-la' ruzá' ladxí' queè', bugunè' neda' dxin. <sup>11</sup>Na'a, chqui' bena' lban neda' o chqui' glunè' lban yela'què' bönni', lè ni le runtú' lban qui len le gyéjlè'li' lbi'ili'.

**Ubanru' lu yöl-la' gut**

<sup>12</sup>Runtu' lban queë' Cristo ca na' bubanë' lu yöl-la' gut. Chqui' cni nac, ñnacxzc nac, rnali' la'li': "Cutu lubán nup chnatgac"? <sup>13</sup>La'naru' cu lubán nup chnatgac, cutu bubanë' Cristo, <sup>14</sup>len la'naru' cu bubanë' Cristo, daduz nac le bentu' lban qui, len daduz nac yöl-la' rejlä' queëli' Lë'. <sup>15</sup>Yetü ca', la'naru' cu bubanë' Cristo, rzi' yë'tu' cati' runtu' lna' lau queë' Dios, rnatu' buspanë' Cristo, ati' la'naru' cu uspanë' nup chnatgac, Dios cutu buspanë' Cristo. <sup>16</sup>La'naru' cu lubán nup chnatgac, cutu bubanë' Cristo, <sup>17</sup>len la'naru' cu bubanë' Cristo, daduz nac yöl-la' rejlä' queëli' Lë', ati' naga'ngac dul-la' nabága'li'. <sup>18</sup>Lëzca' cni, nup na' chnatgac len gulayejlë' Cristo, tsaz glat chqui' cutu bubanë' Lë'. <sup>19</sup>Chqui' tuz tsal ni zoaru' nabanru' huac uzi'ru' xbë' Cristo, nacr-ru' bayechi' ca yúgu'të bunách.

<sup>20</sup>Na'a, le nactë bubanë' Cristo lu yöl-la' gut, len naquë' nu gzu lau bubán tsaz ladj yúgu'të nup lubán tsaz lu yöl-la' gut. <sup>21</sup>Ca na' gyu'u yöl-la' gut ni'a qui le benë' tuë' bönni', lëzca' cni, ni'a qui le benë' yetüë' bönni' gyu'u yöl-la' rubán quegac nup chnatgac. <sup>22</sup>Ca na' tat yúgu'të bunách le náljlengac Adán, lëzca' cni lubán yúgu'të nup na' náljlengac Cristo. <sup>23</sup>Tu tuë' ubanë' ca ral-la' gac. Zi'al bubanë' Cristo, ati' töd ni lubán nup náquigac queë' Cristo cati' huödë'. <sup>24</sup>Ni'r gdxin dza udx cati' ugüë' Cristo gdutë le dë lu në'i len gdutë yöl-la' uná bë' len gdutë yöl-la' huac qui tu' xöhui', ati' udödë' lu në'ë Dios Xuz

le rna bé'inë' Lë'. <sup>25</sup>Run bayúdx gna bë'ë Cristo ga gdxintë dza chbenë' Dios ga luzechu zxiBgac lahuë' Lë' yúgu'të nup ta'dá'baga' Lë'. <sup>26</sup>Le rdá'baga' Lë' le usnitie' ga udx nac yöl-la' gut. <sup>27</sup>Dios chnudödë' yúgu'të lu në'ë Zxi'në' quië gna bé'inë' lei. Nayúj lu guich la'y, rna: "Budödë' yúgu'të lu në'ë quië gna bé'inë' lei." Na'a, nac bë' cutu budód cuinë' lu në'ë Zxi'në', le nacczë' Lë' Nu rudód lu në'ë Zxi'në' yúgu'të. <sup>28</sup>Cati' gdxin dza ni' chnudödë' Dios lu në'ë Cristo yúgu'të quië gna bé'inë' lei, ni'r Lëczë' Zxi'në' udód cuinë' lu në'ë Dios, Nu na' budód lu në'ë Zxi'në' yúgu'të, ati' ga udx, Dios gna bé'inë' tsaz yúgu'të.

<sup>29</sup>La'li' rdil-li' nis uláz quegac nup chnatgac. Chqui' ráquili' cutu lubán nup na' chnatgac, ñbizx quië rdil-li' nis uláz quegac nup chnatgac?

<sup>30</sup>Zoa banádx queëtu' gattu' yúgu'të dza. ñBizx quië rui'tu' latj gac cni chqui' cutu ubanru' lu yöl-la' gut? <sup>31</sup>Yúgu'të dza zoa banádx gatia'. Rguíxjöi'da' lbi'ili' lë ni, böchi' lza'adau', le rdzag ladxa'a le bena'. Bena' ga réjlë'li' Xanru' Jesucristo. <sup>32</sup>Chqui' le gu'nzda' gdíl-lena' böa' guixi' snia' lu yödz Éfeso, ñbizxa caz uzi'a xbey? Chqui' cutu lubán nup chnatgac, ral-la' gunru' ca ta'ná bunách: "Gui'j gáguru' le huatru' cxö huidzj."

<sup>33</sup>Cutu güi'li' latj nu si' ye'i lbi'ili'. Chqui' si' lu na'li' lati'z le cutu nac, gdütëli' huöacl'i' chul nit. <sup>34</sup>Gul-bí'i ládxi'li' len cutu gunli' dul-la' le cunúnbë'li'-në' Dios la'li' lbi'ili'. Rnia' cni quië guna' ga utui'li'.

**Ca lac nup lubán lu yöl-la' gut**

<sup>35</sup>Nax ca' zoa nu gna: “¿Nacx lubán nup chnatgac? ¿Nacx gac gdu ca nayá' nabinquë' cati' ludxinë'?”  
<sup>36</sup>Li', bönni' cunözi. Lë na' razu' luyú cutu glen chqui' cutu nit. <sup>37</sup>Lë na' razu' luyú nac tu xseydau'z, nax ca' qui xzoa' xtil o qui yetú guixi' cuandau'. Lë na' razu' cutu nac guixi' cuandau' na' ral-la' glen. <sup>38</sup>Dios runë' ga gac guixi' cuandau' ca nunczë' qui. Ca nac tu tu xseydau' na' runë' ga gac guixi' cuandau' qui. <sup>39</sup>Lëzca' cni, cutu nac tuz ca nac bëla' qui queëc'ba' yúgu'tëba' böa' guixi'. Zoa tu bëla' quegac bunách len yetú ca nac bëla' quec'ba' böa' guixi'. Yetú ca nac bëla' quec'ba' bguinn len yetú ca nac bëla' quec'ba' bö. <sup>40</sup>Lëzca' cni nadzá' gdu ca nayá' nabingac nup nacué' yehua' yubá ca nac gdu ca nayá' nabingac nup nacué' luyú ni. Zoa tu yöl-la' lach quegac nup nacué' yehua' yubá, len yetú ca nac yöl-la' lach quegac nup nacué' luyú ni. <sup>41</sup>Zoa tu yöl-la' lach qui gbidz, len yetú qui beo', len yetú quegac bölj luzxbá. Yöl-la' lach qui tu bölj luzxbá nadzá' ca nac yöl-la' lach qui yetú bölj luzxbá. <sup>42</sup>Lëzca' cni gac cati' lubán nup chnatgac. Cati' rgachi' yeru ba nac tu bëla' nit. Cati' ubán, ni'r gac tu le soa tsaz. <sup>43</sup>Cati' rgachi' yeru ba nac tu bëla' ca'z len le nacuidi'. Cati' ubán, ni'r gac tu le lach len le nal. <sup>44</sup>Cati' rgachi' yeru ba nac tu bëla' qui yödzyú ni. Cati' ubán, ni'r gac tu le soa tsaz yehua' yubá. Zoa tu bëla' qui yödzyú ni, len yetú ca gac le gdzag bö' nacczru'.  
<sup>45</sup>Nayúj lu guich la'y le rna: “Bönni' na' gzu lahuë' zoë' luyú ni,

lë' Adán, Dios benë' lë' bönni' ban”, san Bönni' gyazië' xlatjë' Adán, Lë' Cristo, Dios benë' ga naquë' Bó' nabániru'. <sup>46</sup>Cutu bdxin zi'al lë na' nac Bö'. Bdxin zi'al lë na' nac qui yöl-la' bunáchz queëru', ati' ni'r bdxin lë na' nac Bö'. <sup>47</sup>Bönni' ni' gzoë' zi'al, gúquinë' yu. Bönni' na' zoë' burópl, Nu na' nac Xanru', brujë' yehua' yubá. <sup>48</sup>Nup nacué' luyú ni nacgac ca guquë' bönni' na' gúquinë' yu, ati' nup ral-la' tsajcuá' yehua' yubá lac ca nac Nu na' bruj yehua' yubá. <sup>49</sup>Ca na' na'a dë queëru' tu bëla' le nac ca gac bëla' queë' bönni' na' gúquinë' yu, lëzca' ral-la' huóáquiru' ca náquinë' Nu na' bruj yehua' yubá.

<sup>50</sup>Cni rë'ni gna lë ni rëpa' lbi'ili', böchi' lza'adau', rnia': Le náquini bëla' len rön cutu ca' tsaz ga ni' rna bë'ë Dios, len lëzca' cni, lë na' nit cutu gdli-li' lë na' zoa tsaz.  
<sup>51</sup>Gul-yutsca', rëpa' lbi'ili' tu le bgachi': Cutu gatrú' yúgu'tëru', san Dios utsë'ë ca nacru' yúgu'tëru'. <sup>52</sup>Tu tsalz gac, tsca nac tu le rutáz yøj lauru', cati' cödx trompeta le rajseytë. Cödx trompeta na', ati' lubán nup chnatgac, láquini tu le soa tsaz, ati' Dios utsë'ë le náquiniru' yúgu'tëru'.  
<sup>53</sup>Lë na' nacru' le rnit ral-la' huöac le soa tsaz, ati' le náquiniru', lë na' ral-la' gat, huöac tu le gatga gat. <sup>54</sup>Cati' lë na' rnit chnuhuóac le soa tsaz, lenca' lë na' ral-la' gat chnuhuóac le gatga gat, ni'r utság lë na' nayúj lu guich la'y, rna:  
 Nadúa tsaz yöl-la' gut.  
 Chbdél-li'në' Cristo.  
<sup>55</sup>Cutur gna be'i rë'u yöl-la' gut.  
 Cutur bi gac gun queëru' yöl-la' gut.

<sup>56</sup>Huac bi gun queëru' yöl-la' gut le nabága'ru' dul-la', ati' nabága'ru' dul-la' le rdá'baga'ru' zxba queë' Dios. <sup>57</sup>Xclenë' Dios. Lëczë' runë' ga nularu' lu yöl-la' gut ni'a qui le benë' Xanru' Jesucristo.

<sup>58</sup>Qui læ ni na', böchi' lza'adau', gul-zóa tsutsu. Gul-gác gdu ládxi'li', gúnteczli' xchinë' Xanru' le nóziczli' cutu runli' daduz xchinë' Xanru'.

**Tu'nódzj quequë' böchi'gac  
ta'yadzjnë' bunách Corinto**

**16** Na'a, ca nac qui dumí na' unödzejli' le gaclen böchi'ru' ta'yejlë'ë Cristo nacu'ë Jerusalén, gul-gún na'a ca na' gna bé'ida' yugu' cö' bunách queë' Cristo, nacuá' luyú Galacia. <sup>2</sup>Yugu' dza domingo, tu tuli' ral-la' cu'li' quizi lati' dumí, tsca na' Dios runnë' queëli'. Gul-gún chi'i lei, cui gun bayúdx bi utubli' cati' gdxina' ga zoali'. <sup>3</sup>Cati' ni' gdxina' ga zoali', gsöla'a Jerusalén nup na' ucua'li' lbi'ili'. Uzuja' lu guich le gun ga lac bë'quë', ati' lu'ë dumí na' unödzejli'. <sup>4</sup>Chqui' ral-la' tsija' ca' neda', tsjáclenë' neda'.

**Le rë'nnë' gunë' Pablo**

<sup>5</sup>Guida' ga zoali' cati' udx töda' yugu' yödz luyú Macedonia, le run bayúdx töda' yugu' yödz na'. <sup>6</sup>Ráquida' ugá'nlena' lbi'ili' tu chi'i o nazx ca' uga'na' ni' yugu' beo' ziaq. Ni'r huac gáclenli' neda', ugu'li' neda' nöz gátí'tëz ga ral-la' tsija'. <sup>7</sup>Cati' guida' duyúa' lbi'ili' cutu rë'nda' tödza' ni'. Runa' löz sóalena' lbi'ili' xtsey, chqui' gunnë' neda' latj Xanru'. <sup>8</sup>Uga'na' ni lu yödz Éfeso ga gdxinr dza Pentecostés <sup>9</sup>le dë latj ni guna' tu

dxin zxön queë' Xanru', zal-la' zian nup ta'dá'baga' neda'.

<sup>10</sup>Chqui' gdxinbi' ga zoali' bi'i Timoteo, gul-güi' ládxi'li'-bi', cui ubi ugu'i'ibi' tsal ni' sóalenbi' lbi'ili', le runbi' xchinë' Xanru' ca na' runa' xchinë' neda'. <sup>11</sup>Qui læ ni na', nutu nu ral-la' uzóa læbi' tsal'. Gul-gaclen-bi', ugu'li'-bi' nöz gdu tsáhui'dau', quië udxinbi' ga ni zoa' neda', le rböza'-bi' læbi' lenca' böchi'ru' túnlenë'-bi' tsaxxón dxin.

<sup>12</sup>Ca nac queë' böchi'ru' Apolos, sxzöni gúta'yua' lahuë' tsijë' tsajyüë' lbi'ili' tsaxxón len yugu' böchi'ru'. Cutu rë'nnë' tsijë' na'a. Guidë' cati' sáqui'në'.

**Didza' ru'ë Pablo ga ruúdx**

<sup>13</sup>Gul-spán ládxi'li' len gul-gác tsutsu ca réjlë'li'-në' Cristo. Gul-gác rugu ladxli' len gul-típ ládxi'li'. <sup>14</sup>Len yöl-la' nadxí'i gul-gún bíti'tëz bi gunli'.

<sup>15</sup>Na'a, böchi' lza'adau', chnóziczli' ca nac queë' Estéfanos lenca' quegac di'a dza queë'. Nacgac nup gulazú laugac ta'yejlë' Cristo ladj bunách nacuá' luyú Acaya. Guludód cuinquë' bönni' ni quië lunë' xchingac bunách queë' Dios. <sup>16</sup>Ráta'yua' lauli', böchi' lza'adau', gunli' ba la'n nup nacgac ca böchi'ru' na', lenca' ca nacgac nup tunlen lequë' tsaxxón dxin len taclen lequë'. <sup>17</sup>Rudzijda' le guladxinë' ga zoa' Estéfanos, len Fortunato, len Acaico, le gláclenë' neda' uláz queëli'. <sup>18</sup>Guluhuí' zxönë' neda' ca na' guluhuí' zxönë' ca lbi'ili'. Gul-gún ba la'n bunách cni.

<sup>19</sup>Tu'gáp Dios lbi'ili' yugu' cö' bunách queë' Dios luyú Asia ni. Tu'gapë' Dios



lbi'ili' Aquilo len Priscila lenca' nup  
tu'dúb queë' Dios ga nac lu yu'u lidxquë'.

<sup>20</sup>Tu'gapë' Dios lbi'ili' yúgu'të bóchi'ru'  
ni. Gul-gáp Dios tuli' yetuli', unída'li'  
lza'li'.

<sup>21</sup>Neda', Pablo, na' cuincza' ruzuja' lu  
guich læ ni, rnia': Rugapa' Dios lbi'ili'.

<sup>22</sup>Nu cunadxí'i Xanru' Jesucristo,  
chnabía dö' nu na'.

Gda Xanru'.

<sup>23</sup>Rnabda'-në' Xanru' Jesucristo  
uzá' ladxë'ë queëli'. <sup>24</sup>Nadxi'tida'  
yúgu'tëli' le nacru' tuz len Xanru'  
Jesucristo. Ca' gac.